

過去現在因果經

宋三藏求那跋陀羅譯



清刻龍藏佛說法變相圖

過去現在因果經卷第一

尺五

宋三藏求那跋陀羅譯

如是我聞一時佛在舍衛國祇樹給孤獨園
爾時世尊與諸比丘住於竹林是諸比丘於
晨朝時著衣持鉢入城乞食還歸所住食竟
澡漱各攝衣鉢集在講堂悉欲共說過去因
緣爾時世尊以淨天耳超於世間聞諸比丘
語論之聲即從座起到講堂上於衆中坐問
諸比丘汝等共集欲說何法時諸比丘即白
佛言世尊我等食竟澡漱已訖故共集此各
欲聞說過去因緣是時世尊語諸比丘汝等
樂聞過去因緣者諦聽諦聽善思念之今爲
汝說比丘白言唯然世尊願樂欲聞佛言比
丘過去無數阿僧祇劫爾時有一仙人名曰
善慧淨修梵行求一切種智爲欲成就此大

智故樂處生死周徧五道一身死壞復受一身生死無量譬如盡天下草木斬以爲籌數其故身不能窮盡夫極天地之始終謂之一劫而其經天地成壞者不可稱載也所以感傷羣生耽惑愛欲沉流苦海起慈悲心欲拔濟之又作此念今諸衆生沒於生死不能自出皆由貪欲瞋恚愚癡樂著色聲香味觸法故我當決定斷其此病雖生諸趣不忘斯念於諸衆生怨親平等以布施攝貧窮持戒攝毀禁忍辱攝瞋恚精進攝懈怠禪定攝亂意

智慧攝愚癡如是長夜增益衆生普爲一切而作歸依於諸如來恭敬供養樂欲聽法亦爲他說常以四事奉給衆僧於佛法衆尊重守護如是諸行不可稱計爾時有王名曰燈照城名提播婆底其國人民壽八萬歲安隱

豐樂極爲熾盛所欲自在猶如諸天時彼國王正法治世不枉人民無有殺戮楚撻之苦視諸人民有如一子時燈照王始生太子端嚴無比威德具足有三十二相八十種好初生之日四方皆明日月珠火不復爲用王見

八五

太子有如此瑞即現諸臣共集議言太子初生有此奇特當爲太子作何等名諸臣答言應名太子以爲普光又召相師而占相之相師答言今觀太子若在家者爲轉輪王統四天下若出家者爲天人尊成薩婆若王及夫人後宮嫔女聞相師言於此太子深生愛念亦爲天龍夜叉乾闥婆阿脩羅迦樓羅緊那羅摩睺羅伽人非人等供養恭敬尊重讚歎是時太子在於後宮爲夫人嫔女說種種法太子年至二萬九千歲捨轉輪王位啓其父

母求欲出家既不聽已乃至三請猶尚不許
太子慈悲志存拯濟忍其小違以成大順即
便往詣山林樹下剃除鬚髮被著法服勤修
苦行滿六千歲成阿耨多羅三藐三菩提爲
諸天人及八部衆轉於法輪此輪微妙一切
世間天人魔梵所不能轉以三乘法教化衆
生所可利益不可稱數爾時父王及其夫人
後宮嫔女聞太子普光成阿耨多羅三藐三
菩提心大歡喜踊躍無量爾時羣臣國內人
民婆羅門等聞太子道成心各念言太子普
光捨轉輪王位剃除鬚髮被著法服出家修
道得成正覺我等今者亦當出家作此念已
悉皆往詣普光佛所爾時普光如來即觀其
心隨其因緣而爲說法大臣婆羅門等有四
千人成阿羅漢國中人民及餘四方諸來會

衆有八萬人亦得無著法忍爾時普光如來
與八萬四千諸阿羅漢往諸國界遊行教化
父王聞已心大歡喜即勅國中平治道路香
水灑地懸諸繒綵寶幢幡蓋散衆名華如是
莊嚴滿十二踰闍那又復擊鼓唱令國內諸
有華者不得私賣悉輸與王并勅人民不得
先我供養於佛即遣大臣并作妓樂燒香散
華而往請彼普光如來爾時善慧仙人在於
山中得五奇特夢一者夢卧大海二者夢枕
須彌三者夢海中一切衆生入其身內四者
夢手執日五者夢手執月得此夢已即大驚
寤心自念言我今此夢非爲小緣當以問誰
宜入城內問諸智者作是念已披鹿皮衣手
執水瓶及杖繖蓋行入城邑路過外道所止
住處有五百人而爲上首善慧念言我今當

以所夢問之并得觀其所修之業即共諸人講論道義破其異見時五百人即便受屈求爲弟子於善慧所深生恭敬各以銀錢一枚而以上之復有五百外道既見善慧辯才聰明亦生隨喜時諸外道自共議言今普光如來出興于世善慧仙人聞斯語已舉體毛豎心大歡喜踊躍無量便與外道分別而去外道問言師何所趣答言我今當往普光佛所欲施供養外道白言師若去者願樂隨從善慧答曰我今有緣宜應先行爾時善慧賫五百銀錢緣路而去諸外道衆悲戀懊惱辭別而歸善慧至前見王家人平治道路香水灑地列幢旛蓋種種莊嚴即便問言何因緣故而作是事王人答言世有佛興名曰普光今燈照王請來入城所以忽忽莊嚴道路善慧

即復問彼路人汝知何處有諸名華答言道士燈照大王擊鼓唱令國內名華皆不得賣悉以輸王善慧聞已心大懊惱意猶不息苦訪華所俄爾即遇王家青衣密持七莖青蓮華過畏王制令藏者瓶中善慧至誠感其蓮華踊出瓶外善慧遙見即追呼曰大姊且止此華賣不青衣聞已心大驚愕而自念言藏華甚密此何男子乃見我華求索買耶顧看其瓶果見華出生奇特想答言男子此青蓮華當送宮內欲以上佛不可得也善慧又言請以五百銀錢雇五莖華青衣意疑復自念言此華所直不過數錢而今男子乃以銀錢五百求買五莖即問之言欲持此華用作何等善慧答曰今有如來出興於世燈照大王請來入城故須此華欲以供養大姊當知諸

佛如來難可值遇如優曇鉢華時時乃現青

尺五

五

衣又問供養如來爲求何等善慧答曰爲欲成就一切種智度脫無量苦衆生故爾時青衣得聞此語心自念言今此男子顏容端正披鹿皮衣裁蔽形體乃爾至誠不惜錢寶即語之曰我今當以此華相與願我生生常爲君妻善慧答言我修梵行求無爲道不得相許生死之緣青衣即言若當不從我此願者華不可得善慧又曰汝若決定不與我華當從汝願我好布施不逆人意若使有來從我乞求頭目髓腦及與妻子汝莫生礙壞吾施心青衣答言善哉善哉敬從來命今我女弱不能得前請寄二華以獻於佛使我生生不失此願好醜不離必置心中令佛知之爾時燈照王與其諸子及衆官屬婆羅門等持好

香華種種供具而出奉迎普光如來舉國人民亦皆隨從是時善慧五百弟子共相謂言今日國王及諸臣民悉皆往詣普光佛所大師今者亦當已去我等宜應往彼禮敬作此言已即共俱行在道未遠逢見善慧師徒相遇喜悅無量即共同詣普光佛所見燈照王已到佛前最得在初供養禮拜如是次第至諸大臣亦各禮敬并散名華華悉墮地于時善慧與五百弟子見諸人衆供養畢已諦觀如來相好之容又欲濟拔諸苦衆生亦欲滿足一切種智故即散五華皆住空中化成華臺後散二莖亦止空中來佛兩邊爾時國王及其眷屬一切臣民天龍夜叉乾闥婆阿脩羅迦樓羅緊那羅摩睺羅伽人非人等見此奇特歎未曾有於是普光如來以無礙智讚

善慧言善哉善哉善男子汝以是行過無量
 阿僧祇劫當得成佛號釋迦牟尼如來應正
 徧知明行足善逝世間解無上士調御丈夫
 天人師佛世尊當於善慧受記之時無量天
 龍夜叉乾闥婆阿脩羅迦樓羅緊那羅摩睺
 羅伽人非人等散衆妙華滿虛空中而發誓
 言善慧將來成佛道時我等皆願爲其眷屬
 是時普光如來即記之曰汝等皆當得生其
 國爾時如來既授記已猶見善慧作仙人髻
 披鹿皮衣如來欲令捨此服儀即便化地以
 爲淤泥善慧見佛應從此行而地濁濕心自
 念言云何乃令千輻輪足蹈此而過即脫皮
 衣以用布地不足掩泥仍又解髮亦以覆之
 如來即便踐之而度因記之曰汝後得佛當
 於五濁惡世度諸天人不以爲難必如我也

于時善慧聞斯記已歡欣踊躍喜不自勝即
 時便解一切法空得無生忍身昇虛空去地
 七多羅樹以偈讚佛

今見世間導 令我開慧眼 爲說清淨法
 去離一切著 今遇天人尊 令我得無生

願將來獲果 亦如兩足尊

七

是時善慧說此讚已從空中下到於佛前五
 體投地而白佛言唯願世尊哀愍我故聽我
 出家爾時普光如來答言善哉善來比丘鬚
 髮自落袈裟著身即成沙門爾時有二貧窮
 老人各與親屬一百人俱覩佛相好威德嚴
 顯自傷貧乏無以供養是時如來愍其心至
 即化前地生諸草穢令二貧人見地不淨發
 歡喜心而便灑掃普光如來而記之曰汝過
 無量阿僧祇劫釋迦牟尼佛出興於世汝等

爾時當作第一聲聞弟子爾時普光如來記
貧人已與八萬四千比丘及燈照王并婆羅
門諸臣民等前後圍遶入提播婆底城時燈
照王與其眷屬以四事供養普光如來并及
八萬四千比丘經四萬歲王即捨位以付其
子與其眷屬及夫人眷屬各八萬四千人同
於佛法出家修道得陀羅尼諸法三昧善慧
比丘亦隨普光如來受王供養滿四萬歲於
諸法中得深三昧教化衆生不可稱數爾時
善慧比丘白普光如來言世尊我於昔日在
深山中得五奇特夢一者夢卧大海二者夢
枕須彌三者夢海中一切衆生入我身內四
者夢手執日五者夢手執月唯願世尊爲我
解說此夢之相爾時普光如來答言善哉汝
若欲知此夢義者當爲汝說夢卧大海者汝

身即時在於生死大海之中夢枕須彌者出
於生死得般涅槃相夢大海中一切衆生入
身內者當於生死大海爲諸衆生作歸依處
夢手執日者智慧光明普照法界夢手執月
者以方便智入於生死以清涼法化導衆生
今離惱熱以此夢因緣是汝將來成佛之相
善慧聞已歡喜踊躍不能自勝禮佛而退爾
時普光如來復經少時入般涅槃善慧比丘
護持正法滿二萬歲以三乘法教化衆生所
利益者不可稱計爾時善慧比丘於彼命終
即便上生爲四天王以三乘法化諸天衆盡
彼天壽下生人間爲轉輪王王四天下七寶
具足一金輪寶二白象寶三紺馬寶四神珠
寶五玉女寶六主藏臣寶七主兵臣寶千子
具足皆悉勇健能伏怨敵以正法治無諸憂

惱常以十善化諸人民於此壽終生忉利天
爲彼天主壽終下生爲轉輪聖王終其壽命
乃至生於第七梵天上爲天王下爲聖主各
三十六反其間或爲仙人或爲外道六師或
爲婆羅門或爲小王如是變現不可稱數爾
時善慧菩薩功行滿足位登十地在一生補
處近一切種智生兜率天名聖善慧爲諸天
主說於一生補處之行亦於十方國土現種
種身爲諸衆生隨應說法期運將至當下作
佛即觀五事一者觀諸衆生熟與未熟二者
觀時至與未至三者觀諸國土何國處中四
者觀諸種族何族貴盛五者觀過去因緣誰
最真正應爲父母觀五事已即自思惟今諸
衆生皆是我初發心以來所成熟者堪能受
於清淨妙法於此三千大千世界此閻浮提

迦比羅旃國最爲處中諸族種姓釋迦第
一甘蕉苗裔聖王之後觀白淨王過去因緣
夫妻真正堪爲父母又觀摩耶夫人壽命脩
短懷抱太子滿足十月太子便生生七日已
其母命終既作此觀又自思惟我今若便即
下生者不能廣利諸天人衆仍於天宮現五
種相令諸天子皆悉覺知菩薩期運應下作
佛一者菩薩眼現瞬動二者頭上華萎三者
衣受塵垢四者腋下汗出五者不樂本座時
諸天衆忽見菩薩有此異相心大驚怖身諸
毛孔血流如雨自相謂言菩薩不久捨於我
等爾時菩薩又現五瑞一者放大光明普照
三千大千世界二者大地十八相動須彌海
水諸天宮殿皆悉震搖三者諸魔宮宅隱蔽
不現四者日月星辰無復光明五者天人八

部身皆震動不能自禁是時堯率諸天見菩薩身已有五相又復覩外五希有事皆悉聚集到菩薩所頭面禮足白言尊者我等今日見此諸相舉身震動不能自安唯願爲我釋此因緣菩薩即便答諸天言善男子當知諸行皆悉無常我今不久捨此天宮生閻浮提于時諸天聞此語已悲號涕泣心大憂惱舉體血現如波羅奢華或有不復樂於本座或有棄其莊嚴之具或有宛轉迷悶於地或有深歎無常苦者爾時有一天子即說偈言

菩薩在於此尺五開我等法眼十今者遠我去如盲離導師又如欲渡水忽然失橋船亦似嬰孩兒喪亡其慈母我等亦如是失所歸依處方漂生死流了無有出緣我等於長夜爲疑箭所射既失大醫王

誰當救我者滯卧無明牀長沒愛欲海永絕尊者訓未見超出期爾時菩薩見諸天子悲泣懊惱又復聞說戀慕之偈即以慈音而告之曰善男子凡人受生無不死者恩愛合會必有別離上至阿迦膩吒天下至阿毗地獄其中一切諸衆生等無有不爲無常大火之所煎炙是故汝等不應於我獨生戀慕我今與汝皆悉未離生死熾火乃至一切貧富貴賤皆不免脫於是菩薩即說偈言

諸行無常是生滅法生滅滅已寂滅爲樂爾時菩薩語諸天子言此偈乃是過去諸佛之所共說諸行性相法皆如是汝等今日勿生憂惱我於生死無量劫來今者唯有此一生在不久當得離於諸行汝等當知今是度

脫衆生之時我應下生閻浮提中迦比羅旃
 梵國甘蔗苗裔釋姓種族白淨王家我生彼
 已遠離父母棄捨妻子及轉輪王位出家學
 道勤修苦行降伏魔怨成一切種智轉於法
 輪一切世間天人魔梵所不能轉亦依過去
 諸佛所行法式廣利一切諸天人衆建大法
 幢傾倒魔幢竭煩惱海淨八正路以諸法印
 印衆生心設大法會請諸天人汝等爾時亦
 當皆同在於此會飡受法食以是因緣不應
 憂惱爾時菩薩以偈頌曰

我於此不久 當下閻浮提 加比羅旃
 白淨王宮生 辭父母親屬 捨轉輪王位
 出家行學道 成一切種智 建立正法幢
 能竭煩惱海 閉塞惡趣門 淨開八正道
 廣利諸天人 其數不可計 以是因緣故

不應生憂惱

爾時菩薩舉身毛孔皆放光明諸天子等聞
 菩薩言又復見身出大光明歡喜踊躍離諸
 憂苦各心念言菩薩不久當成正覺爾時菩
 薩觀降胎時至即乘六牙白象發旃率宮無

量諸天作諸妓樂燒衆名香散天妙華隨從
 菩薩滿虛空中放大光明普照十方以四月
 八日明相出時降神母胎于時摩耶夫人於
 眠寤之際見菩薩乘六牙白象騰虛而來從
 右脇入身現於外如處瑠璃夫人體安快樂
 如服甘露顧見自身如日月照心大歡喜踊
 躍無量見此相已廓然而覺生希有心即便
 往至白淨王所而白王言我於向者眠寤之
 際其狀如夢見諸瑞相極爲奇特王即答言
 我向亦見有大光明又復覺汝顏貌異常汝

可爲說所見瑞相夫人即便具說上事以偈
頌曰

八五

十二

見有乘白象 皎淨如日月 釋梵諸天衆
皆悉執寶幢 燒香散天華 并作衆妓樂
充滿虛空中 圍遶而來下 來入我右脇
猶如處瑠璃 今以現大王 此爲何瑞相
爾時白淨王見摩耶夫人說瑞相已歡喜踊
躍不能自勝即便遣請善相婆羅門以妙香
華種種飲食而供養之供養畢已示夫人右
脇并說瑞相白婆羅門言願爲占之有何等
異時婆羅門即占之曰大王夫人所懷太子
諸善妙相不可具說今當爲王略言之耳大
王當知今此夫人胎中之子必能光顯釋迦
種族降胎之時放大光明諸天釋梵執侍圍
遶此相必是正覺之瑞若不出家爲轉輪聖

王王四天下七寶自至千子具足時王聞此
婆羅門言深自慶幸踊躍無量即以金銀雜
寶象馬車乘及以村邑而用供給此婆羅門
時摩耶夫人以其姝女并及珍寶亦以奉施
自從菩薩處胎以來摩耶夫人日更修行六
波羅蜜天獻飲食自然而至不復樂於人間
之味三千大千世界常皆大明其界中間幽
冥之處日月威光所不能照亦皆朗然其中
衆生各得相見共相謂言此中云何忽生衆
生菩薩降胎之時三千大千世界十八相動
清涼香風起於四方諸抱疾者皆悉除愈貪
欲瞋癡亦皆休息爾時梵率天宮有一天子
作是念言菩薩已生白淨王宮我亦當復下
生人間菩薩成佛我得在先爲其眷屬供養
聽法作此念已即便下生王舍城中明月種

八五

十三

姓旃陀羅及多王家復有天子生舍衛國王
家復有天子生偷羅厭國王家復有天子
生犢子國王家復有天子生跋羅國王家復
有天子生盧羅國王家復有天子生德叉尸
羅國王家復有天子生拘羅婆國王家復有
天子生婆羅門家復有天子生長若居士毗
舍首陀羅家復有五百天子生釋種姓家有
如是等諸天子衆其數凡有九十九億下生
人間又從他化自在天乃至四天王所下生
者不可稱計復有色界天王與其眷屬亦皆
下生而作仙人菩薩在胎行住坐卧無所妨
礙又不令母有諸苦患菩薩晨朝於母胎中
爲色界諸天說種種法至日中時爲欲界諸
天亦說諸法於日晡時又復爲諸鬼神說法
於夜三時亦復如是成熟利益無量衆生菩

薩在胎天人嫫女有來禮拜而供養者或復
有來作是願言當令得成轉輪聖王菩薩聞
已心不喜樂或復有來作是願言當令得成
一切種智菩薩聞已心大歡喜菩薩處胎垂
滿十月身諸肢節及以相好皆悉具足亦使
其母諸根寂定樂處園林不喜憤鬧時白淨
王心自思惟夫人懷妊日月將滿而不見其
有生產相作此念時會遇夫人遣信白王我
今欲出園林遊觀時王聞此益懷歡喜即勅
於外令淨掃灑藍毗尼園更使栽植諸妙華
果流泉浴池令悉清潔欄楯階陛皆以七寶
而爲莊嚴翡翠鴛鴦鸞鳳鷄鷩異類衆鳥鳴
集其中懸繒幡蓋散華燒香作諸妓樂猶如
帝釋歡喜之園又勅中間所經行處皆令嚴
淨種種莊飾又勅嚴辦十萬七寶車輦一一

車輦雕玩殊絕又復勅外嚴辦四軍象兵馬
兵車兵步兵又復選取後宮嫔女顏容端正
不老不少氣性調和聰慧明了其數凡有八
萬四千以用給侍摩耶夫人又復擇取八萬
四千端正童女著妙瓔珞嚴身之具賫持香

華先往往彼藍毗尼園王又勅諸羣臣百官
夫人去者皆悉侍從於是夫人即昇寶輿與
諸官屬并及嫔女前後導從往藍毗尼園爾
時復有天龍八部亦皆隨從充滿虛空爾時
夫人既入園已諸根寂靜十月滿足於四月

八五

十五

八日日出時夫人見彼園中有一大樹名
曰無憂華色香鮮枝葉分布極爲茂盛即舉
右手欲牽摘之菩薩漸漸從右脇出于時樹
下亦生七寶七莖蓮華大如車輪菩薩即便
墮蓮華上無扶持者自行七步舉其右手而

師子吼我於一切天人之中最尊最勝無量
生死於今盡矣此生利益一切人天說是言
已時四天王即以天繒接太子身置寶机上
釋提桓因手執寶蓋大梵天王又持白拂侍
立左右難陀龍王優波難陀龍王於虛空中
吐清淨水一盥一涼灌太子身身黃金色有
三十二相放大光明普照三千大千世界天
龍八部亦於空中作天妓樂歌頌讚頌燒衆
名香散諸妙華又雨天衣及以瓔珞繽紛亂
墜不可稱數爾時摩耶夫人生太子已身安
快樂無有苦患歡喜踊躍止於樹下前後自
然忽生四井其水香潔具八功德爾時摩耶
夫人與其眷屬隨所欲須自恣洗漱復有諸
夜叉王皆悉圍遶守護太子及摩耶夫人當
爾之時閻浮提人乃至阿迦膩吒天雖離喜

樂皆亦於此歡喜讚歎一切種智今出於世
無量衆生皆得利益唯願速成正覺之道轉
於法輪廣度衆生唯有魔王獨懷愁惱不安
本座當爾之時所感瑞應三十有四一者十
方世界皆悉大明二者三千大千世界十八
相動丘墟平坦三者一切枯木悉更敷榮國
界自然生奇特樹四者園苑生異甘果五者
陸地生寶蓮華大如車輪六者地中伏藏悉
自發出七者諸藏珍寶放大光明八者諸天
妙服自然來降九者衆川萬流恬靜澄清十
者風止雲除空中明淨十一者香風芬芳從
四方來細雨潤澤以斂飛塵十二者國中疾
病皆悉除愈十三者國內宮舍無不明曜燈
燭之光不復爲用十四者日月星辰停住不
行十五者毗舍佉星下現人間侍太子生十

六者諸梵天王執素寶蓋列覆宮上十七者
八方諸仙人師奉寶來獻十八者天百味食
自然在前十九者無數寶瓶盛諸甘露二十
者諸天妙車載寶而至二十一者無數白象
子首戴蓮華列住殿前二十二者天紺馬寶
自然而來二十三者五百白師子王從雪山
出息其惡情心懷歡喜羅住城門二十四者
諸天妓女於虛空中作妙音樂二十五者諸
天玉女執孔雀拂現宮牆上二十六者諸天
玉女各持金瓶盛滿香汁列住空中二十七
者諸天歌頌讚太子德二十八者地獄休息
毒痛不行二十九者毒蟲隱伏惡鬼善心三
十者諸惡律儀一時慈悲三十一者國內孕
婦產者悉男其有百疾自然除愈三十二者
一切樹神化作人形悉來禮侍三十三者諸

餘國王各賁名寶同來臣服尺五三十四者一切

十七

人天無非時語爾時諸姝女衆見此瑞相極大歡喜自相謂言太子今生有如此等吉祥之事唯願長壽無諸病苦勿令我等生大憂惱作此言已以天細氎裹抱太子至夫人所時四天王在虛空中恭敬隨從釋提桓因執蓋來覆有二十八鬼神王在園四角守衛奉護爾時有一青衣聰慧明了從藍毗尼園還入宮中到白淨王所而白王言大王威德轉更增進摩耶夫人已生太子顏貌端正有三十二相八十種好墮蓮華上自行七步舉其右手而師子吼我於一切天人之中最尊最勝無量生死於今盡矣此生利益一切人天有如是等諸奇特事非可具說時白淨王聞彼青衣說此語已歡喜踊躍不能自勝即

脫身瓔珞而以賜之爾時白淨王即嚴四兵眷屬圍遶并與一億釋迦種姓前後導從入藍毗尼園見彼園中天龍八部皆悉充滿到夫人所見太子身相好殊異歡喜踊躍猶如江海諸大波浪慮其短壽入懷怵惕譬如須彌山王難可動搖大地動時此山乃動彼白淨王素性恬靜常無歡感今見太子一喜一懼亦復如是摩耶夫人爲性調和旣生太子見諸奇瑞倍增柔軟爾時白淨王叉手合掌禮諸天神前抱太子置於七寶象輿之上與諸羣臣後宮姝女虛空諸天作諸妓樂隨從入城時白淨王及諸釋子未識三寶即將太子往詣天寺太子旣入梵天形像皆從座起禮太子足而語王言大王當知今此太子天人中尊虛空天神皆悉禮敬大王豈不見如

此耶云何而令來此禮我時白淨王及諸釋

尺五

十八

子羣臣內外聞見是已歎未曾有即將太子出於天寺還入後宮當爾之時諸釋種姓亦同一日生五百男時王廐中象生白子馬生白駒牛羊亦生五色羔犢如是等類數各五百王家青衣亦生五百蒼頭爾時宮中五百伏藏自然發出一伏藏有七寶藏而圍遶之又有諸大國賣人從海採寶還迦比羅旃兜國彼諸賣人各賣奇寶而來獻王時白淨王問諸賣人汝等入海採諸珍寶悉皆吉利無苦惱不及諸伴侶無遺落耶彼諸賣人答言大王所經道路極自安隱王聞此言甚大歡喜即遣請諸婆羅門等婆羅門衆皆悉集已設諸供養或與象馬及以七寶田宅僮僕供養畢已抱太子出即便白諸婆羅門言當

爲太子作何等名諸婆羅門即共論議而答

王言太子生時一切寶藏皆悉發出所有諸

瑞莫非吉祥以此義故當名太子爲薩婆悉

達說此語時虛空天神即擊天鼓燒香散華

唱言善哉諸天人民即便稱曰薩婆悉達爾

尺五

十九

時八王亦是日與白淨王同生太子彼諸

國王各懷歡喜我今生子有諸奇異而不知

是薩婆悉達之瑞相也皆集婆羅門各爲太

子制好名字王舍城太子名曰頻毗婆羅舍

衛國太子名波斯匿偷羅拘吒國太子名拘

臘婆犢子國太子名優陀延跋羅國太子名

鬱陀羅延盧羅國太子名曰疾光德叉尸羅

國太子名弗迦羅婆羅拘羅婆國太子名拘

羅婆爾時白淨王普勅羣臣令訪聰明多聞

智慧善知占相爲諸世人所知識者羣臣聞

已四方推覓時王即便於後園中起一大殿
窓牖欄楯七寶莊飾爾時羣臣得五百婆羅
門聰明知相見諸奇瑞欲來詣王會王遣信
疾速而至諸臣白王知相婆羅門今者已到
王聞歡喜即勅令前請入殿坐設諸供養彼
婆羅門即白王言我聞大王新生太子有諸
相好奇持之瑞願令我等悉得見之時王即
勅抱太子出諸婆羅門既見太子相好威嚴
歎未曾有王即問言今占太子其相云何婆
羅門言一切衆生皆欲一好大王今者所生
太子是大珍異勿生憂怖即又白言所生太
子大王雖言是王之子乃是世間人天之眼
王復問言云何得知婆羅門言我觀太子身
色光焰猶如真金有諸相好極爲明淨若當
出家成一切種智若在家者爲轉輪王領四

天下譬如江河海爲第一衆山之中須彌最
勝凡諸光暉日爲無上一切清涼唯有明月
天人世間太子爲尊王聞此語心大歡喜離
諸怵惕彼婆羅門又白王言有一梵仙名阿
私陀具足五通在於香山彼能爲王斷諸疑
惑諸婆羅門說此語已辭別而去爾時白淨
王心自思惟阿私陀仙人居在香山途徑險
絕非人所到當以何方詣來至此王可作此
心念之時阿私陀仙人遙知王意又復先見
諸奇瑞相深解菩薩爲破生死故現受生以
神通力騰虛而來到王宮門時守門者入白
王言阿私陀仙人乘虛空來今在門外王聞
歡喜即勅令前王至門上自奉迎之既見仙
人恭敬禮拜而即問言尊者既來住門不進
爲守門者不聽前也仙人答言無見止者既

來相詣宜須先白王便隨從入於後宮敬請
令坐而問訊言尊者四大常安和不仙人答
言蒙大王恩幸得安樂時白淨王白仙人言
尊者今日能來下降我等種族方大熾盛從
今已去日就吉祥爲是經過故來此耶仙人
答言我在香山見大光明諸奇特相又知大
王心之所念以是因緣故來到此我以神力
乘虛而至聞上諸天說王太子必當得成一
切種智度脫天人又王太子從右脇生墮於
七寶蓮華之上而行七步舉其右手而師子
吼我於天人之中最尊最勝無量生死於今
盡矣此生利益一切天人又復諸天圍遶恭
敬聞有如此大奇特事快哉大王宜應欣慶
太子今者可得見不即將仙人至太子所王
及夫人抱太子出欲禮仙人時彼仙人即止

王曰此是天人三界中尊云何而令禮於我
耶時彼仙人即起合掌禮太子足王及夫人
白仙人言唯願尊者爲相太子仙人言善即
便占相具見相已忽然悲泣不能自勝王及
夫人見彼仙人悲泣流淚舉身顫怖生大憂
惱如大波浪動於小船問仙人言我子初生
具諸瑞相有何不祥而悲泣耶爾時仙人獻
欵答言大王太子相好具足無有不祥王又
問言願更爲我占視太子有長壽相不得轉
輪王位王四天下不我年既暮欲以國土皆
悉付之當隱山林出家學道所可志願唯在
於此尊者爲觀必定果耶爾時仙人又答王
言大王太子具三十二相一者足下安平立
如奩底二者足下千輻網輪輪相具足三者
手足相指長勝於餘人四者手足柔軟勝餘

身分五者足跟廣具足滿好六者足指合縵
網勝於餘八七者足趺高平好與跟相稱八
者伊泥延鹿腩纖好如伊泥延鹿王九者
平住兩手摩膝十者陰藏相如馬王象王十
一者身縱廣等如尼俱盧樹十二者一一孔
一毛生青色柔軟右旋十三者毛上向靡青
色柔軟右旋十四者金色相其色微妙勝閻
浮檀金十五者身光面一丈十六者皮薄細
滑不受塵垢不停蚊蚋十七者七處滿兩足
下兩手中兩肩^{八五}上項中皆滿字相分明十八
者兩腋下滿如摩尼珠十九者身如師子二
十者身廣端直二十一者肩圓好二十二者
四十齒二十三齒白齊密而根深二十四
者四牙最白而大二十五者方頰車如師子
二十六者味中得上味咽中二處津液流出

二十七者舌大軟薄能覆面至耳髮際二十
八者梵音深遠如迦陵頻伽聲二十九者眼
色如金精三十者眼睫如牛王三十一者眉
間白毫相軟白如兜羅綿三十二者頂髻肉
成具有如此相好之身若在家者年二十九
爲轉輪聖王若出家者成一切種智廣濟天
人然王太子必當學道得成阿耨多羅三藐
三菩提不久當轉清淨法輪利益天人開世
間眼我今年壽已百二十不久命終生無想
天不覩佛興不聞經法故自悲耳又問仙人
尊者向占言有二種一當作王一成正覺而
今云何言決定成一切種智時仙人言我相
之法若有衆生具三十二相或生非處又不
明顯此人必爲轉輪聖王若三十二相皆得
其處又復明顯此人必成一切種智我觀大

王太子諸相皆得其所又極明顯是以決定知成正覺仙人爲王說此語已辭別而退爾時白淨王旣聞仙人決定之說心懷愁惱慮恐出家即擇五百青衣賢明多智爲作妳母養視太子其中或有乳者或有抱者或有浴者或有浣濯者如是等比供給太子皆悉具足又復別爲起三時殿溫涼寒暑各自異處其殿皆以七寶莊嚴衣裳服飾皆悉隨時王恐太子棄家學道使其城門開閉之聲聞四十里又復擇取五百妓女形容端正不肥不瘦不長不短不白不黑才能巧妙各兼數技皆以名寶瓔珞其身百人一番迭代宿衛於其殿前列樹甘果枝葉蔚映華實繁茂又有浴池清流澄潔池邊香草雜色蓮華綺靡芬敷不可稱計異類之鳥數百千種光麗心目

趣悅太子太子旣生始滿七日其母命終以懷太子功德大故上生忉利封受自然太子自知福德威重無有女人堪受禮者故因將終託之而生爾時太子姨母摩訶波闍波提乳養太子如母無異時白淨王勅作七寶天冠及以瓔珞而與太子太子年漸長大爲辦象馬牛羊之車凡是童子所玩好具無不給與爾時舉國人民皆行仁惠五穀豐熟風雨以時又無盜賊快樂安隱皆是太子福德力故時王又以青衣所生是車匿等五百蒼頭給侍太子至年七歲父王心念太子已大宜令學書訪覓國中聰明婆羅門善諸書藝請使令來以教太子爾時有一婆羅門名跋陀羅尼與五百婆羅門以爲眷屬來受王請即白婆羅門言欲屈尊者爲太子師此可爾不

婆羅門言當隨所知以授太子時白淨王更
 為太子起大學堂七寶莊嚴牀榻學具極令
 精麗卜擇吉日即以太子與婆羅門而令教
 之爾時婆羅門以四十九書字之本教令讀
 之于時太子見此事已問其師言此何等書
 閻浮提中一切諸書凡有幾種師即默然不
 知所答又復問言此阿一字有何等義師又
 默然亦不能答內懷慙愧即從座起禮太子
 足而讚歎言太子初生行七步時自言天人
 之中最尊最勝此言不虛唯願為說閻浮提
 書凡有幾種太子答言閻浮提中或有梵書
 或佉樓書或蓮華書有如是等六十四種此
 阿字者是梵音聲又此字義是不可壞亦是
 無上正真道義凡如此義無量無邊爾時婆
 羅門深生慙愧還至王所而白王言大王太

子是天人中第一之師云何而欲令我教耶
 爾時父王聞婆羅門言倍生歡喜歎未曾有
 即厚供養彼婆羅門隨意所須凡諸技藝典
 籍議論天文地理算數射御太子皆悉自然
 知之

八五

三五

過去現在因果經卷第一

音釋

繖蘇早切織絲
 縷為蓋也
 裔以制切苗
 裔種類也
 瞬輪閭切
 目動也
 鵲
 崇芻切鵲
 鵲鳥名
 鷲鷲也
 佉去切
 佉切
 怵怵切
 怵切
 妳奴切
 妳切
 的切怵怵
 恐懼也
 賣賣切
 賣切
 奩離切
 匣也
 妳奴切
 妳切

過去現在因果經卷第二

尺六

宋三藏求那跋陀羅譯

爾時太子年至十歲諸釋種中五百童子皆亦同年太子從弟提婆達多次名難陀次名孫陀羅難陀等或有三十相三十一相者或復雖有三十二相相不分明各開技藝有大筋力時提婆達多等五百童子既聞太子諸藝皆通名徹十方共相謂言太子雖復聰明智慧善解書論至於力膂詎勝我等欲與太子校其勇健爾時父王又訪國中善知射者而召之來令教太子即往後園欲射鐵鼓提婆達多等五百童子亦悉隨從時師即便授一小弓而與太子太子含笑而問之言以此與我欲作何等射師答言欲令太子射此鐵鼓太子又言此弓力弱更求如是七弓將來

師即授與太子便執七弓以射一箭過七鐵鼓時彼射師往白王言大王太子自知射藝以一箭力射過七鼓闔浮提中無能等者云何令我爲作師耶爾時白淨王聞此語已心大歡喜而自念言我子聰明書論算數四遠悉知而其射藝四方人民未有知者即勅太子及提婆達多等五百童子又復擊鼓唱令國界太子薩婆悉達却後七日當出後園欲試武藝諸人民中有勇力者可悉來此到第七日提婆達多與六萬眷屬最先出城于時有一大象當城門住此諸軍衆皆不敢前提婆達多問諸人言何故住此而不前耶諸人答言有一大象當門而立舉衆畏之故不敢前提婆達多聞此言已獨前象所以手搏頭即便躡地於是軍衆次第得過爾時難陀又

與眷屬亦欲出城其諸軍衆徐步漸前難陀即問何故行遲諸人答言提婆達多手搏一象躡在城門妨行者路以是故遲難陀即便前至象所以足指挑象擲著路傍無數人衆聚共看之爾時太子與十萬眷屬前後圍遶始出城門見於路傍人衆聚看即便問曰此諸人輩爲何所看從人答言提婆達多手搏一象躡在城門妨人行路難陀次出以足指挑擲著於此是故行人悉聚看之於是太子即自念言今者正是現力之時太子便即以手執象擲著城外還以手接不令傷損象又還甦無所苦痛時諸人民歎未曾有王聞此已深生奇特如是太子及提婆達多并與難陀四遠人民皆悉來集在彼園中爾時彼園種種莊嚴施列金鼓銀鼓偷石之鼓銅鐵等

鼓各有七枚爾時提婆達多最先射之徹三金鼓次及難陀亦徹三鼓諸來人衆悉皆雅歎爾時羣臣白太子言提婆達多及與難陀皆已射訖今者次第正在太子唯願太子射此諸鼓如是三請太子曰善而語之言若欲使我射諸鼓者此弓力弱更覓强者諸臣答言太子祖王有一良弓今在王庫太子語言便可取來弓既至已太子即牽以放一箭徹過諸鼓然後入地泉水流出又亦穿過大鐵圍山爾時提婆達多又與難陀共相撲戲二人力等亦無勝者太子又前手執二弟躡之於地以慈力故不令傷痛爾時四遠諸人民衆既見太子有如此力高聲唱言白淨王太子非但智慧勝一切人其力勇健亦無等者莫不歎伏益生恭敬爾時白淨王即會諸臣

而共議言太子今者年已長大智慧勇健皆悉具足今宜應以四大海水灌太子頂又復勅下餘小國王却後二月八日灌太子頂皆可來集至二月八日諸餘國王并及仙人婆羅門等皆悉雲集懸繒旛蓋燒香散華鳴鍾擊鼓作諸妓樂以七寶器盛四海水諸仙人衆各各頂戴授婆羅門如是乃至徧及諸臣悉已頂戴傳授與王時王即以灌太子頂以七寶印而用付之又擊大鼓高聲唱言今立薩婆悉達以爲太子爾時虛空天龍夜叉人非人等作天妓樂異口同音讚言善哉當於迦比羅旆兜國立太子時餘八國王亦於是日同立太子爾時太子啓王出遊王即聽許時王即與太子并諸羣臣前後導從案行國界次復前行到王田所即便止息閻浮樹下

看諸耕人爾時淨居天化作壤蟲鳥隨啄之太子見已起慈悲心衆生可愍互相吞食即便思惟離欲界愛如是乃至得四禪地日光所赫樹爲曲枝隨蔭太子爾時白淨王四面推求問覓太子從人答曰太子今在閻浮樹下時王即便與諸羣臣徃彼樹所未至之間遙見太子端坐思惟又見彼樹曲蔭其軀深生奇特時王即前執太子手問言汝今何故在於此坐太子答言觀諸衆生更相吞食甚可傷愍王聞此語心生憂惱慮其出家宜急婚娉以悅其意尺六即便呼之俱共還國太子答言願停於此王聞其語心即念言彼阿私陀往日常說太子今者將如其言王即流淚重喚還國太子既見父王如此即便隨從歸於所止王恐愁憂不樂在家更增妓女而娛樂

之爾時太子至年十七王集諸臣而共議言太子今者年已長大宜應爲其訪索婚所諸臣答言有一釋種婆羅門名摩訶那摩其人有女名耶輸陀羅顏容端正聰明智慧賢才過人禮儀備舉有如是德堪太子妃王即答言若如卿語便爲納之王還宮內即勅宮中聰明有智舊宿女人汝可往至摩訶那摩長者之家瞻看其女容儀禮行爲何如耶可停於彼至滿七日受王勅已即便往彼長者之家於七日中具觀此女還答王言我觀此女容貌端正威儀進止無與等者王聞其言極大歡喜即便遣人語摩訶那摩言太子年長欲爲納妃諸臣並言汝女淑令宜堪此舉今欲相屈時摩訶那摩答王使言謹奉勅旨王即令諸臣擇採吉日遣車萬乘而往迎之既

至宮已具足太子婚姻之禮又復更增諸妓女衆晝夜娛樂爾時太子恒與其妃行住坐卧未曾不俱初自無有世俗之意於靜夜中但修禪觀時王日日問諸嫒女太子與妃相接近不嫒女答言不見太子有夫婦道王聞此語愁憂不樂更增妓女而娛樂之如是經時猶不接近時王深疑恐不能男爾時太子聞諸妓女歌詠園林華果茂盛流泉清淨太子忽便欲出遊觀即遣妓女往白王言在宮日久樂欲暫出園林遊戲王聞此語心生歡喜而自念言太子當是不樂在宮行夫婦禮所以求出園林去耳即便聽之勅諸羣臣整治園觀所經道路皆令清淨太子即便往至王所頭面禮足辭出而去時王即便勅一舊臣聰明智慧善言辯者令從太子爾時太子

與諸官屬前後導從出城東門國中人民聞太子出男女盈路觀者如雲時淨居天化作老人頭白背偃拄杖羸步太子即便問從者言此爲何人從者答曰此老人也太子又問何謂爲老答曰此人昔日曾經嬰兒童子少

年遷謝不住遂至根熟形變色衰飲食不消氣力虛微坐起苦極餘命無幾故謂爲老太子又問唯此人老一切皆然從者答言一切皆悉應當如此爾時太子聞是語已生大苦惱而自念言日月流邁時變歲移老至如電身安足恃我雖富貴豈獨免耶云何世人而不怖畏太子從本以來不樂處世又聞此事益生厭離即迴車還愁思不樂時王聞已心懷煎憂恐其學道更增妓女以娛樂之爾時太子復經少時啓王出遊王聞此言心生憂

慮而自念言太子前出逢見老人憂愁不樂尺六今者云何而復求出王愛太子不忍違異僂俛從之即集諸臣而共議言太子前者出城東門逢見老人還輒不樂今者已復求出遊觀吾不能免遂復許之諸臣答言當更嚴勅

外諸官屬修治道路懸繒旛蓋散華燒香皆使華麗無令臭穢諸不淨潔及以老疾在道側也爾時迦比羅旆兜城四門之外各有一園樹木華果浴池樓觀種種莊嚴皆悉無異王問諸臣外諸園觀何者爲勝諸臣答言外諸園觀皆等無異如忉利天歡喜之園王又勅言太子前出已從東門今者可令從南門出爾時太子百官導從出城南門時淨居天化作病人身瘦腹大喘息呻吟骨消肉竭顏貌痿黃舉身顫掉不能自持兩人扶掖在於

路側太子即問此爲何人從者答曰此病人也太子又問何謂爲病答曰夫謂病者皆由嗜欲飲食無度四大不調轉變成病百節苦痛氣力虛微飲食寡少眠卧不安雖有身手不能自運要假他力然後坐起爾時太子以

尺六

七

慈悲心看彼病人自生愁憂又復問言此人獨爾餘皆然耶答曰一切人民無有貴賤同有此病太子聞已心自念言如此病苦普應嬰之云何世人耽樂不畏作此念已深生恐怖身心顛動譬如月影現波浪水語從者言如此身者是大苦聚世人於中橫生歡樂愚癡無識不知覺悟今者云何欲往彼園遊觀嬉戲即便迴車還入王宮坐自思惟愁憂不樂王問從者太子今出寧有樂不從者答言始出南門逢見病人以此不樂即迴車還王

聞此語心大愁憂慮其出家時王即便問諸臣言太子前者出城東門逢見老人愁憂不樂以此事故吾勅卿等淨治道路無令老病在於巷側云何今出於城南門而復致有疾病人耶又令太子逢值見之諸臣答言近受王勅嚴命外伺勿使有諸臭穢老病在於道側互相檢覆無敢懈怠不知何緣忽有病人非是我等之罪咎也爾時王問諸從者言汝等並見病人在路何從而至從者答曰無有蹤跡不知何來時王深於太子生猶豫心恐其學道更增妓女而悅其意又復欲使於五欲中生戀著心爾時有一婆羅門子名憂陀夷聰明智慧極有才辯時王即便請來入宮而語之言太子今者不樂在世受於五欲恐其不久出家學道汝可與之共作朋屬具說

世間五欲樂事令其心動不樂出家時憂陀夷即便答言太子聰明無與等者所知書論皆悉淵博並是我今所未曾聞云何見使誘說之耶譬以藕絲欲懸須彌我亦如是終不能迴太子之心大王既勅令作朋友要當自竭我所知見時^{尺六}憂陀夷受王勅已隨從太子行住坐卧不敢遠離時王又復選諸妓女聰明智慧顏容端正善於歌舞能感人者種種莊飾光麗悅目皆悉遣往給侍太子爾時太子復經少時啓王出遊王聞此語心自念言彼憂陀夷既與太子共爲朋友今若出遊或勝於前無復厭俗樂出家心作是念已即便聽許時王又復集諸大臣悉語之言太子今者復求出遊我不忍違已復聽之太子前出東南二門已見老病還輒憂愁今者宜令從

西門出我心慮其還又不樂然憂陀夷是其良友冀今出還不復應爾卿等好令修治道路園林臺觀皆使嚴整香華旛蓋數倍於前無令復有老病臭穢在道側也臣受勅已即語外司嚴治道路并及園林光麗倍常王又先送諸妙妓女置彼園中又復勅語憂陀夷言若當路側有不祥事可以方便誘悅其心并勅諸臣隨從太子皆令伺察若有不吉遠驅逐之爾時太子與憂陀夷百官導從燒香散華作衆妓樂出城西門時淨居天心自念言先現老病於二城門舉衆皆見令白淨王瞋責從者并及外司太子今出王制嚴峻我今現死人若皆見者增王忿怒必加罰戮枉及無辜我於今日所現之事唯令太子及憂陀夷二人見耳使餘官屬不受責也作此念

已即便來下化爲死人四人舉輿以諸香華布散屍上室家大小號哭送之爾時太子與憂陀夷二人獨見太子問言此爲何人而以華香莊飾其上復有人衆號哭相送時憂陀夷以王勅故默然不答如是三問淨居天王威神之力使憂陀夷不覺答言是死人也太子又問何謂爲死憂陀夷言夫謂死者刀風解形神識去矣四體諸根無所復知此人在世貪著五欲愛惜錢財辛苦經營唯知積聚不識無常今者一旦捨之而死又爲父母親戚眷屬之所愛念命終之後猶如草木恩情好惡不復相關如是死者誠可哀也太子聞已心大戰怖又問憂陀夷言唯此人死餘亦當然即復答言一切世人皆應如此無有貴賤而得免脫太子素性恬靜難動旣聞此語

不能自安即以微聲語憂陀夷世間乃復有此死苦云何於中而行放逸心如木石不知怖畏即勅御者可迴車還御者答言前出門未到園所中路而返致令大王深見瞋責今者豈敢復如此耶時憂陀夷語御者言如汝所說不應便歸即復前行至彼園中香華旖蓋作衆妓樂衆妓端正猶如諸天姝女無異於太子前各競歌舞異以姿態悅動其意太子心安不可移轉即止園中蔭息樹間除其侍衛端坐思惟憶昔曾在閻浮樹下遠離欲界乃至得於第四禪定爾時憂陀夷到太子所而作此言大王見勅令與太子共爲朋友脫有得失互相開悟朋友之法其要有一者見有過失輒相諫曉二者見有好事深生隨喜三者在於苦厄不相棄捨今獻誠言

願不見責古昔諸王及今現在皆悉受於五欲之樂然後出家太子云何永絕不顧又人生世宜順人行無有棄國而學道者唯願太子受於五欲令有子息不絕王嗣爾時太子而答之言誠如所說但我以捐國故爾亦復不言五欲無樂以畏老病生死之苦故於五欲不敢愛著汝向所言古昔諸王先經王欲然後出家此諸王等今在何許以愛欲故或在地獄或在餓鬼或在畜生或在人天以有如是輪轉苦故是以我欲離老病苦生死法耳汝今云何令我受之時憂陀夷雖竭才辯勸獎太子不能令迴即便退坐歸於所止太子仍勅嚴駕還宮諸妓女衆及憂陀夷愁憂慘感顏貌顰蹙如人新喪所愛親屬太子到宮惻愴倍常時白淨王呼憂陀夷而問之

言太子今出寧有樂不憂陀夷言出城不遠逢見死人亦不知其從何而來太子與我同時見之太子問言此爲何人我亦不覺答是死人時王即復問諸從者汝等皆見城西門外有死人不從者答言我等不見王聞此語神意豁然而自念言太子憂陀夷二人獨見此是天力非諸臣咎必定當如阿私陀言作此念已心大苦惱復增妓女以娛樂之日遣人慰誘太子而語之言國是汝有何故愁憂而不樂耶王又嚴勅諸妓女衆悅太子意勿捨晝夜時白淨王雖知天力非復人事愛重太子不能不言心自思惟太子前已出三城門今者唯有北門未出其必不久更求出遊當復莊嚴彼外園林倍令光麗勿使有諸不可意事如所思惟具勅諸臣時王又復心

自願言太子若出城北門時唯願諸天勿復現於不吉祥事復令我子心生憂惱既心願已逆勅御者太子若出當令乘馬使得四望見諸人民光麗莊飾是時太子啓王出遊王不忍違便與憂陀夷及餘官屬前後導從出城北門到彼園所太子下馬止息於樹除去侍衛端坐思惟念於世間老病死苦時淨居天化作比丘法服持鉢手執錫杖視地而行在太子前太子見已即便問言汝是何人比丘答言我是比丘太子又問何謂比丘答言能破結賊不受後身故曰比丘世間皆悉無常危脆我所修學無漏聖道不著色聲香味觸法未得無爲到解脫岸作此言已於太子前現神通力騰虛而去當爾之時諸從官屬皆悉覩見太子既已見此比丘又聞廣說出

家功德會其宿懷厭欲之情便自唱言善哉尺六善哉天人之中唯此爲勝我當決定修學是道作此語已即便索馬還歸宮城於時太子心生欣慶而自念言我先見有老病死苦晝夜常恐爲此所逼今見比丘開悟我情示解脫路作此念已即自思惟方便求覓出家因緣爾時白淨王問憂陀夷言太子今出寧有樂不時憂陀夷即答王言太子向出所經道路無諸不祥既到園中太子獨自在於樹下遙見一人剃除鬚髮著染色衣來太子前而共言語言語既畢騰虛而去竟亦不知何所論說太子因是嚴駕而歸當爾之時顏容歡悅還至宮中方生憂愁時白淨王既聞此語心生狐疑亦復不知是何瑞相深懷懊惱而自念言太子決定捨家學道又其納妃久而

無子我今應勅耶輸陀羅當思方便莫絕國
嗣復應警誡勿使太子去而不知既作是念
如所思惟即便勅於耶輸陀羅耶輸陀羅聞
王勅已心懷慙愧默然而住行止坐卧不離
太子時王復增諸妙妓女以娛樂之爾時太
子年一十九心自思惟我今正是出家之時
而便往至於父王所威儀庠序猶如帝釋往
詣梵天傍臣見已而白王言太子今者來大
王所王聞此言憂喜交集太子既至頭面作
禮爾時父王即便抱之而勅令坐太子坐已
白父王言恩愛集會必有別離唯願聽我出
家學道一切衆生愛別離苦皆使解脫願必
垂許不見留難時白淨王聞太子語心大苦
痛猶如金剛摧破於山舉身顫掉不安本座
執太子手不復能言啼泣流淚噓唏哽咽如

是良久微聲而言汝今宜應息出家意所以
者何年既少壯國未有嗣而便委我曾不迴
顧爾時太子既見父王流淚不許還歸所止
思惟出家愁憂不樂爾時迦比羅旃國諸
大相師並知太子若不出家過七日後得轉
輪王位王四天下七寶自至各以所知往白
王言釋迦種姓於此方興王聞是語心生歡
喜即勅諸臣并釋種子汝聞相師如此言不
皆應日夜侍衛太子於城四門門各千人周
帀城外一踰闌那內羅置人衆而防護之復
勅耶輸陀羅并諸內官倍加警誡過於七日
勿使出家時王又來至太子所太子遙見即
往奉迎頭面禮足問訊起居王語太子我昔
既聞阿私陀說及衆相師并諸奇瑞必定知
汝不樂處世國嗣既重屬當相係唯願爲我

生汝一子然後絕俗不復相違爾時太子聞父王言心自思惟大王所以苦留我者正自爲國無紹嗣耳作是念已而答王言善哉如勅即以左手指其妃腹時耶輸陀羅便覺體異自知有娠王聞太子如勅之言心大歡喜

尺六

十四

當謂太子七日之內必未有兒若過此期轉輪王位自然而至不復出家爾時太子心自念言我年已至一十有九今是二月復是七日宜應方便思求出家所以者何今正是時又於父王所願已滿作此念已身放光明照四天王宮乃至照於淨居天宮不令人間見此光明爾時諸天見此光已皆知太子出家時至即便來下到太子所頭面禮足合掌白言無量劫來所修行願今者正是成熟之時於是太子答諸天言如汝等語今正是時然

父王勅內外官屬嚴見防衛欲去無從諸天白言我等自當設諸方便令太子出使無知者諸天即便以其神力令諸官屬皆悉淳卧爾時耶輸陀羅眠卧之中得三大夢一者夢月墮地二者夢牙齒落三者夢失右臂得此夢已眠中驚覺心大怖懼白太子言我於眠中得三惡夢太子問言汝夢何等耶輸陀羅即便具說所夢之事太子語言月猶在天齒又不落臂復尚在當知諸夢虛假非實汝今不應橫生怖畏耶輸陀羅又語太子如我自忖所夢之事必是太子出家之瑞太子又答汝但安眠勿生此慮要不令汝有不祥事耶輸陀羅聞此語已即便還眠太子即從座起徧觀妓女及耶輸陀羅皆如木人譬如芭蕉中無堅實或有倚伏於樂器上臂脚垂地更

尺六

十五

相枕卧鼻涕目淚口中流涎又復徧觀妻及妓女見其形體髮爪髓腦骨齒髑髏皮膚肌肉筋脉肪血心肺脾腎肝膽腸胃屎尿涕唾外爲華囊中盛臭穢無一可奇強熏以香飾以華綵譬如假借當還亦不得久百年之命卧消其半又多憂惱其樂無幾世人云何恒見此事而不覺悟又於其中貪著姪欲我今當學古昔諸佛所修之行急應遠此大火之聚爾時太子思如是已至於後夜淨居天王及欲界諸天充滿虛空即共同聲白太子言内外眷屬皆悉憐卧今者正是出家之時爾時太子即便自往至車匿所以天力故車匿自覺而語之言汝可爲我鞍健陟來爾時車匿聞此言已舉身顫怖心懷猶豫一者不欲違太子命二者畏王勅旨嚴峻思惟良久流

淚而言大王慈勅如是之嚴且又今者非遊觀時又非降伏怨敵之日云何於此後夜之中而忽索馬欲何所之太子又復語車匿言我今欲爲一切衆生降伏煩惱結使賊故汝今不應違我此意爾時車匿舉聲號泣欲令耶輸陀羅及諸眷屬皆悉覺知太子當去以天神力昏卧如故車匿即便牽馬而來太子徐前而語車匿及以健陟一切恩愛會當別離世間之事易可果遂出家因緣甚難成就車匿聞已默然無言於是健陟不復噴鳴爾時太子見明相出放身光明徹照十方師子吼言過去諸佛出家之法我今亦然於是諸天捧馬四足并接車匿釋提桓因執蓋隨從諸天即便令城北門自然而開不使有聲太子於是從門而出虛空諸天讚歎隨從爾時

太子又師子吼我若不斷生老病死憂悲苦惱終不還宮我若不得阿耨多羅三藐三菩提又復不能轉於法輪要不還與父王相見若當不盡恩愛之情終不還見摩訶波闍波提及耶輸陀羅當於太子說此誓時虛空諸天讚言善哉斯言必果至于天曉所行道路已三踰閼那時諸天衆既從太子至此處已所爲事畢忽然不現爾時太子次行至彼跋伽仙人苦行林中太子見此園林寂靜無諸誼鬧心生歡喜諸根悅豫即便下馬撫背而言所難爲事汝作已畢又語車匿馬行駿疾如金翅鳥王汝恒隨從不離我側世間之人或有善心而形不隨或運形力而心不稱汝今心形皆悉無違又世間人處富貴者竟隨奉事我既捨國來此林中唯汝一人獨能隨

我甚爲希有八六我今既已至閑靜處十七汝便可與犍陟俱還宮也爾時車匿聞此語已悲號啼泣迷悶躄地不能自勝於是犍陟既聞被遣屈膝舐足淚落如雨車匿答言我今云何忍聽太子如此言耶我於宮中違大王勅輒跋犍陟以與太子致令今日來至於此父王及摩訶波闍波提失太子故必當憂惱宮中內外亦應騷動又復此處多諸險難猛獸毒蟲交橫道路我今云何而捨太子獨還宮耶太子即便答車匿言世間之法獨生獨死豈復有伴又有生老病死諸苦我當云何與此伴侶吾今爲欲斷諸苦故而來至此苦若斷時然後當與一切衆生而作伴侶我於即時諸苦未離云何而得爲汝作侶車匿又曰太子生來長於深宮身體手足皆悉柔軟眠卧牀

褥無不細滑如何一旦履藉荆棘瓦礫泥土止宿樹下太子答言誠如汝語設我住宮乃可免此荆棘之患老病死苦會自見侵車匿既聞太子此語悲泣垂淚默然而住于時太子即就車匿取七寶劍而師子吼過去諸佛

爲成就阿耨多羅三藐三菩提故捨棄飾好剃除鬚髮我今亦當依諸佛法作此言已便脫寶冠髻中明珠以與車匿而語之曰以此寶冠及以明珠致王足下汝可爲我上白大王我今不爲生天樂故亦復非不孝順父母亦無忿恨瞋恚之心但以畏彼生老病死爲除斷故來至此耳汝應助我隨喜欣慶勿於吉祥更生悲愁父王若謂我今出家未是時者汝以我語上啓大王老病死至豈有定時人雖少壯焉得免此父王若復而責我言本

要有子當聽出家今未有子云何而去及出宮時不啓聞者汝可爲我具啓父王耶輸陀羅久已有娠王自問之昔勅如此非爲專輒往古有諸轉輪聖王馱國位者入於山林出家求道無有中途還受五欲我今出家亦復

如是未成菩提終不還宮內外眷屬皆當於我有恩愛情可以汝辯爲解釋之勿使於我橫生憂惱太子又復脫身瓔珞以授車匿而語之言汝可爲我持此瓔珞奉摩訶波闍波提道我今爲斷諸苦本故出宮城求滿此願勿復於我反更生苦又脫身上餘莊嚴具以與耶輸陀羅亦復語言人生於世愛別離苦我今爲欲斷此諸苦出家學道勿以我故恒生愁憂并諸親屬皆亦如是爾時車匿聞此語已倍增悲絕不忍違於太子勅令即便長

跪受取寶冠明珠瓔珞及嚴飾具垂淚而言
我聞太子如此志願舉身顛掉設令有人心
如木石聞此語者亦當悲感況我生來奉侍
太子聞此誓言而不感絕唯願太子捨於此
志勿令父王及摩訶波闍波提耶輸陀羅并

八六

十九

餘親屬生大悲苦若使決定不迴此意勿於
是處而復棄我我今歸依太子足下終不見
有違離去理設當還宮王必責我云何獨委
太子而歸欲令何言上答大王太子答言汝
今不應作如此語世皆離別豈常集聚我生
七日而母命終母子尚有死生之別而況餘
人汝勿於我偏生戀慕可與健陟俱還宮也
如是再勅猶不肯去爾時太子便以利劍自
剃鬚髮即發願言今落鬚髮願與一切斷除
煩惱及以習障釋提桓因接髮而去虛空諸

天燒香散華異口同音讚言善哉善哉爾時
太子剃鬚髮已自見其身所著之衣猶是七
寶即心念言過去諸佛出家之法所著衣服
不當如此時淨居天於太子前化作獵師身
被袈裟太子既見心大歡喜而語之言汝所
著衣是寂靜服往昔諸佛之幟幟也云何著
此而爲罪行獵者答言我著袈裟以誘羣鹿
鹿見袈裟皆來近我我得殺之太子又言若
如汝說著此袈裟但欲爲殺諸鹿故耳非求
解脫而服之也我今持此七寶之衣與汝貿
易吾服此衣爲欲攝救一切衆生斷其煩惱
獵者答言善哉如告即脫寶衣而與獵者自
被袈裟依過去諸佛所服之法時淨居天還
復梵身上昇虛空歸其所止于時空中有異
光明車匿見此心生奇特歎未曾有今此瑞

應非爲小緣車匿既見太子剃除鬚髮身著法服定知太子必不可迴悶絕於地倍增煩惱爾時太子而語之言汝今宜應捨此悲愁便還宮城具宣我意太子於是即徐前行車匿歔歔頭面作禮乃至遠望不見太子然後方起舉體顫掉不能自勝顧看犍陟及莊嚴具鳴咽悲哽涕泗交流即牽犍陟執持寶冠嚴身之具車匿號咷犍陟悲鳴緣路而還爾時太子即便前至跋伽仙人所住之處時彼林中有諸鳥獸既見太子皆悉矚目端住不瞬跋伽仙人遙見太子而自念言此是何神爲日月天爲帝釋耶便與眷屬來迎太子深生敬重而作是言善來仁者太子既見諸仙人衆心意柔軟威儀庠序太子即便前其住處諸仙人等無復威光皆悉同來請太子坐

太子坐已觀察彼諸仙人之行或有以草而爲衣者或以樹皮樹葉以衣服者或有唯食草本華果或有一日一食或二日一食或三日一食如是行於自餓之法或事水火或奉日月或翹一脚或卧塵土或有卧於荊棘之上或有卧於水火之側太子既見如此苦行即便問於跋伽仙人汝等今者修此苦行甚爲奇特皆欲求於何等果報仙人答言修此苦行爲欲生天太子又問諸天雖樂福盡則窮輪迴六道終爲苦聚汝等云何修諸苦因以求苦報太子即便心自歎言實人爲寶故入大海王爲國土興師相伐今諸仙人爲生天故修此苦行作是歎已默然而住跋伽仙人即問太子仁者何意默然不言我等所行非真正耶太子答言汝等所行非不至苦然

求果報終不離苦太子與諸仙人設此議論
言語往復乃至日暮太子即便停彼一宿既
至明旦復更思惟此諸仙人雖修苦行皆非
解脫真正之道我今不應止住於此即與仙
人辭別欲去時諸仙人白太子言仁者來此
我皆歡喜令我人衆威德增盛今者何故而
忽欲去爲是我等失於威儀爲此衆中相犯
觸耶以何因緣不住於此太子答言非是汝
等有如是失賓主之儀亦無所少但汝所修
增長苦因我今學道爲斷苦本以此因緣是
故去耳諸仙人衆自共議言其所修道極爲
廣大云何我等而得留之爾時有一仙人善
知相法語衆人言今此仁者諸相具足必當
得於一切種智爲天人師即便俱往詣太子
所而作是言所學道異不敢相留若欲去者

可向北行彼有大仙名阿羅邏迦蘭仁者可
往就其語論我觀仁者亦當不必住於彼處
於是太子即便北行諸仙人衆見太子去心
懷懊惱合掌隨送極望絕視然後乃還爾時
太子既出宮已至於天曉耶輸陀羅及諸婁
女從眠而覺不見太子悲號啼泣即便往啓
摩訶波闍波提今旦忽失太子所在摩訶波
闍波提聞是語已迷悶躡地如是展轉乃至
達王王聞此言屹然無聲失其情魄若喪四
體舉宮內外皆亦如是時諸大臣即入檢視
太子住處案行宮城見城北門尺六自然已開又
復不見車匿捷步即問門司誰開此者互相
推檢皆云不知并問防人亦云不解此門開
意于時大臣心自思惟北門既開太子必當
從此而出宜速尋覓太子所在即勅千乘萬

騎駱驛四出追求太子以天力故迷失道徑
不知所之即便還歸白大王言推尋太子不
知所在爾時車匿步牽捷陟及莊嚴具悲泣
嗚咽隨路而還舉邑人民見此驚愕無不懊
惱悉皆競來問車匿言汝送太子置於何處
今與捷陟而獨還耶車匿既得諸人此問倍
更悲絕不能答之此諸人民雖見捷陟被帶
鞍勒七寶莊嚴不見太子猶若死人飾以華
綵於是車匿前入宮城捷陟悲嘶諸廐羣馬
一時哀鳴外諸官屬白摩訶波闍波提及耶
輸陀羅言車匿唯與捷陟俱還聞此言已宛
轉于地而自念曰今者唯聞車匿捷陟相隨
俱還而不聞道太子歸聲摩訶波闍波提即
作是言我養太子至年長一旦捨我不知
所在譬如果樹結華成實臨熟落地又如飢

人遇百味饌臨欲食之忽然翻倒耶輸陀羅
又自言曰我與太子行住坐卧不相遠離今
者捨我莫知所趣古昔諸王入山學道皆將
妻子不暫相棄世間之人一過相識別不相
忘夫婦之情恩愛之深而乃反更如是之薄
詰車匿言寧與智者而作怨讎不共愚人以
爲親厚汝癡頑人盜送太子置於何處令此
釋族不復熾盛又責捷陟汝載太子出此王
宮近去之時寂然無聲今者空返何意悲嘶
爾時車匿即便答言勿責於我及以捷陟所
以者何此是天力非人所爲當於爾夕夫人
嫫女皆悉昏卧太子勅我令起鞍馬我於爾
時以大高聲而諫太子欲使夫人及諸嫫女
聞此驚悟及鞍捷陟都無覺者城門每開聞
四十里當爾之時自然而開又無一聲如此

之事豈非天力出城之時天令諸神手捧馬足并接於我虛空諸天隨從無數我當云何而能止耶時天既曉行三踰闍那至彼跋伽仙人住處又復有奇特異事願聽我說太子既至跋伽仙人苦行林中即便下馬手撫馬背并勅於我令還宮城我於此時隨從太子求無歸意太子見遣終不聽住又復就我取七寶劍而自唱言過去諸佛爲成就阿耨多羅三藐三菩提故捨於飾好剃除鬚髮我今亦當依諸佛法唱此言已即脫寶冠及以明珠悉付我還置王足下又以瓔珞與摩訶波闍波提餘莊嚴具以與耶輸陀羅我於爾時雖聞此誨猶侍左右無有歸情于時太子便以利劍自剃鬚髮天於空中隨接而去即便前行逢於獵者以身所著七寶妙衣而與獵

人貿易袈裟於是虛空有大光明八六我見太子形服既變深知其意必不可迴我即悶絕心大懊惱太子前至跋伽仙人所住之處我便於彼辭別而歸此諸奇特皆是天力非復人事願勿責我及犍陟也時摩訶波闍波提及耶輸陀羅既聞車匿說此事已心小醒悟默然無聲爾時白淨王悶絕始醒勅喚車匿而語之言汝云何令諸釋種姓生大苦惱我有嚴制勅内外官屬守護太子畏其出家汝復何意輒輟犍陟而與太子令密去耶車匿聞已生大怖懼而啓王言太子出城實非我咎唯願大王聽我具說即以寶冠及髻中明珠置王足下太子令我以此冠珠置王足下七寶瓔珞與摩訶波闍波提餘莊嚴具與耶輸陀羅王見諸物倍增悲絕雖復木石猶尚有

感況乃父子恩愛之深車匿具以前事而啓
王言太子勅我父王若謂本要有子當聽出
家今未有子云何而去臨去之時又不啓者
汝可爲我具答父王耶輸陀羅久已有娠王
宜問之昔勅如此非爲專輒王聞此言即便
遣問耶輸陀羅太子云汝久已有娠實如此
不耶輸陀羅即答信言當於大王來此宮時
太子指我即覺有娠王聞其語生奇特心憂
惱暫歇而自念言我前所以許令有子聽出
家者七日之中必無子理轉輪王位自然而
至不謂七日未滿而便有娠深自咎悼智慧
淺短所爲方便不能住之輕作此約重增悔
恨太子神略出人意表今日之事亦復兼是
諸大天力我今不應責車匿也時白淨王心
自思惟太子出家必不可迴設使更作諸餘

方便亦不能留雖復棄國出家學道然已有
子不絕種嗣我今應勅耶輸陀羅好令將護
所懷之子時白淨王愛念情深語車匿言我
今當往尋求太子不知即時定在何許其今
既已捨我學道我復何忍獨生獨活便當追
逐隨其所在爾時王師及與大臣聞王欲出
尋求太子二人俱共來諫王言大王不應自
生憂惱所以者何我觀太子見其相貌過去
世中久已修習出家之業設復令爲釋提桓
因亦當不樂況復今者轉輪王位而能留耶
大王不憶太子初生而行七步舉手住言我
生已盡是最後身諸梵天王釋提桓因悉來
下從如此奇特云何樂世又復白王阿私陀
仙昔相太子年十九出家學道必當成就一
切種智今時既到大王何故而生愁苦又復

大王嚴勅内外守護太子慮恐出家而諸天
來導引出城如是之事非復人力唯願大王
當生歡喜勿懷愁惱不須自出若憶太子猶
不已者我今當與大臣尋求所在王聞此語
心自念言我知太子雖不可迴未忍便捨不
復追之今當試令師及大臣更一尋也即便
答師及大臣言善哉可去舉宮内外心皆苦
惱佇遲速還於是王師大臣即便辭出追尋
太子

過去現在因果經卷第二

音釋

膂兩舉切搏伯各切儼儼彈切儼儼勉切美
也瘳瘳濕危切瘳瘳思切標標早切標標志切
號號手刀切號號啼聲也翹祈堯切嘶先齊切
也歔歔泣氣咽而息也

過去現在因果經卷第三

尺七

宋三藏求那跋陀羅譯

爾時白淨王發遣王師及大臣已即以太子
瓔珞與摩訶波闍波提而語之言此是太子
所服瓔珞付車匿還令以與汝摩訶波闍波
提見瓔珞已倍增悲絕而自念言四天下人
極爲薄福失此明智轉輪聖王又送餘莊嚴
具以與耶輸陀羅而語之曰太子以此嚴身
之具令持與汝耶輸陀羅既見此物悶絕躡
地王又遣人勅耶輸陀羅令自愛敬無使胎
子不安隱也爾時王師及以大臣至跋伽仙
人苦行林中除去從人及諸儀飾便前仙人
所住之處仙人請坐互相問訊於是王師語
仙人言我是白淨王師今所以來至於此者
彼白淨王足相太子猷惡生老病死之苦出

家學道路由此林大仙見不跋伽仙人答王
師言我近於此見一童子顏容端正相好具
足來入此林共我議論遂經一宿不知乃是
王之太子鄙薄我等所修之道從此北行詣
彼仙人阿羅邏迦蘭爾時王師大臣聞此言
已即便疾往彼仙人所而於中路遙見太子
在於樹下端坐思惟相好光明踰於日月即
便下馬除却侍衛脫諸儀服前太子所坐於
一面互相問訊於是王師白太子言大王見
使尋求太子欲有所說太子答言父王遣汝
來欲何所道王師即言大王久知太子深樂
出家此意難迴然王於太子恩愛情深憂愁
盛火常自熾然須太子歸以滅之耳願便迴
駕還返宮城雖有物務不令太子全棄道業
靜心之處不必山林摩訶波闍波提耶輸陀

羅內外眷屬皆悉沒於憂惱大海思太子還而拯救之爾時太子聞王師語以深重聲答王師言我豈不知父王於我恩情深耶但畏生老病死之苦是以來此爲斷除故若令恩愛終日合會又無生老病死苦者我復何爲

二

來至於此我今所以違遠父王欲爲將來和合故耳父王憂愁大火今雖熾然我與父王唯除今生有此一苦將來自當求絕斯患若如汝言令吾處宮修道業者如七寶舍滿中焰火當有人能止此室不如雜毒食設有飢人終不食之我旣棄國出家修道云何令我復還宮城修學道也世間之人在大苦中爲小樂故尚復耽湎不能暫捨況我在此極寂靜處無諸苦患而能捐棄還就於惡古昔諸王入山學道無有中路還受欲者父王若欲

必令我歸便是違於先王之法爾時王師白太子言誠如太子今之所說然諸仙聖一言未來定有果報一言定無此二仙聖尚不能如未來世中必定有無太子云何欲捨現樂而求未來不定果報生死果報尚不可知決

定有無云何乃欲求解脫果唯願太子便還宮也太子答言彼二仙人說未來果一者言有一者言無皆是疑心非決定說我今終不隨順彼教不應以此而見難詰所以者何我今不爲希慕果報而來至此以目所見生老病死必應經之故求解脫免此苦耳令汝不久見我道成我此志願終不可迴還啓父王說如此也爾時太子作此言已即從座起與王師大臣辭別北行詣阿羅邏迦蘭仙人于時王師大臣見太子去啼泣懊惱一者念太

子情深二者奉受王使來太子所而復不能移轉其意徘徊路側不能自返互共議言旣被王使而無力効今者空歸云何奉答我等當留所從五人聰明智慧心意柔軟爲性忠直種族強者密令伺察看其進止作此言已顧看其傍見憐陳如等五人而語之言汝等悉能留止此不五人答言善哉如勅進止去來當密伺察即便辭別趣太子所王師大臣還歸宮城爾時太子往彼阿羅邏迦蘭仙人住處度於恒河路由王舍城旣入城已諸人民衆見太子顏貌相好殊特歡喜愛敬舉國皆悉奔馳瞻視如是誼誨徹頻毗娑羅王王便驚問此是何聲諸臣答言白淨王太子名薩婆悉達昔諸相師記其應得轉輪王位王四天下又復記其若出家者必當成就一切

種智其人今者來入此城外諸人民馳競來看以是之故所以誼鬧時頻毗娑羅王旣聞此語心大歡喜踊躍徧身即勅一人令往伺察太子所在使者受勅尋求太子見在般荼婆山於一石上端坐思惟時使即歸具白大王王便嚴駕與諸臣民詣太子所至般荼婆山遙見太子相好光明踰於日月即便下馬除却儀飾及諸侍衛前坐問訊太子四大悉調和不我見太子心甚歡喜然有一悲太子本是日之種姓累世相承爲轉輪王太子今者轉輪王相皆悉具足云何捨之來入深山踐藉沙土遠至此也我見是故所以悲耳太子若以父王今在故欲不取聖王位者當以我國分半治之若謂爲少我當捨國盡以相奉臣事太子若復不取我此國者當給四兵

可自攻伐取他國也太子所欲甚不相違爾
時太子聞頻毗娑羅王說此語已深感其意
即答王言王之種族本是明月性自高良不
爲鄙事所爲所作無不清勝今發是言未足
爲奇然我觀王中情懇至倍於前後王今便
可於身命財修三堅法亦不應以不堅之法
勸獎餘人我今旣捨轉輪王位亦復何緣應
取王國王以善心捨國與我猶尚不取何緣
以兵伐取他國我今所以辭別父母剃除鬚
髮捨於國者爲斷生老病死苦故非爲求於
五欲樂也世間五欲如火聚燒諸衆生不
能自出云何勸我貪著之耶我今所以來至
此者有二仙人阿羅邏迦蘭是求解脫最上
導師欲往彼處求解脫道不宜久停在於此
也我旣違王初始之言喜心賜我勿致嫌恨

王今當以正法治國勿枉人民作此言已太
子即起而與王別時頻毗娑羅王見太子去
深大惆悵合掌流淚而作是言初見太子心
大踊躍太子旣去倍生悲苦汝今爲於大解
脫故而欲去者不敢相留唯願太子所期速
果若道成者願先見度太子於是辭別而去
時王奉送次於路側極目瞻矚不見乃返爾
時太子即便前至彼阿羅邏仙人之所于時
諸天語仙人言薩婆悉達棄捨國土辭別父
母爲求無上正真之道欲拔一切衆生苦故
今者已來垂至於此時彼仙人旣聞天語心
大歡喜俄爾之頃遙見太子即出奉迎讚言
善來俱還所住請太子坐是時仙人旣見太
子顏貌端正相好具足諸根恬靜深生愛敬
即問太子所行道路得無疲耶太子初生及

以出家又來至此我悉知之能於火聚自覺而出又如大象於罽索中而自免脫古昔諸王盛年之時恣受五欲至於根熟然後方捨國邑樂具出家學道此未足奇太子今者於此壯年能棄五欲遠來至此真爲殊特當勤精進速度彼岸太子聞已即答之曰我聞汝言極爲歡喜汝可爲我說斷生老病死之法我今樂聞仙人答言善哉善哉即便說曰衆生之始始於冥初從於冥初起於我慢從於我慢生於癡心從於癡心生於染愛從於染愛生五微塵氣從五微塵氣生於五大從於五大生貪欲瞋恚等諸煩惱於是流轉生老病死憂悲苦惱今爲太子略言之耳爾時太子即便問曰我今已知汝之所說生死根本復何方便而能斷之仙人答言若欲斷此生

死本者先當出家修持戒行謙卑忍辱住空尺七閑處修習禪定離欲惡不善法有覺有觀得初禪除覺觀定生入喜心得第二禪捨喜心得正念具樂根得第三禪除苦樂得淨念入捨根得第四禪獲無想報別有一師說如此處名爲解脫從定覺已然後方知非解脫處離色想入空處滅有對想入識處滅無量識想唯觀一識入無所有處離於種種想入非想非非想處斯處名爲究竟解脫是諸學者之彼岸也太子若欲斷於老病死患者應當修學如此之行爾時太子聞仙人言心不喜樂即自思惟其所知見非究竟處非是求斷諸結煩惱即便語言我今於汝所說法中有所未解今欲相問仙人答言敬從來意即問之曰非想非非想處爲有我耶爲無我耶若

言無我不應言非想非非想若言有我我爲有知我爲無知我若無知則同木石我若有知則有攀緣既有攀緣則有染著以染著故則非解脫汝以盡於羶結而不自知細結猶存以是之故謂爲究竟細結滋長復受下生

八七

七

以此故知非度彼岸若能除我及以我想一切盡捨是則名爲真解脫也仙人默然心思惟太子所說甚爲深妙爾時太子復問仙人汝年至幾而出家耶修梵行來復幾許年仙人答言我年十六而便出家修梵行來一百四年太子聞已而心念言出家以來乃如是久而所得法正如此乎于時太子爲求勝法即從座起與仙人別爾時仙人語太子言我久遠來習此苦行而所得果正如此耳汝是王種云何而能修苦行耶太子答言汝所

修法非爲苦也別有最苦難行之道仙人既見太子智慧又觀志意堅固不虧知決定成一切種智白太子言汝若道成願先度我於是太子答言善哉次至迦蘭所住之處論議問答亦復如是太子即便前路而去時二仙人見太子去各心念言太子智慧深妙奇特乃爾難測合掌奉送絕視方還爾時太子調伏阿羅邏迦蘭二仙人已即便前進伽闍山苦行林中是憍陳如等五人所止住處即於尼連禪河側靜坐思惟觀衆生根宜應六年苦行而以度之思惟是已便修苦行於是諸天奉獻麻米太子爲求正真道故淨心守戒日食一麻一米設有乞者亦以施之爾時憍陳如等五人既見太子端坐思惟修於苦行或日食一麻或日食一米或復二日乃至七

日食一麻米時憍陳如等亦修苦行供奉太子不離其側既見此已即遣一人還白王師及以大臣具說太子所行之事爾時王師大臣俱還宮門顏貌愁悴身形萎熟猶如有人喪其所親葬送既畢抑忍而歸時守門者而

尺七

白王言師與大臣今在門外王既聞已氣奔聲絕身首裁動時守門人解王此意即呼令前王與相見悲不能言如是良久微聲而問太子既是我之性命卿等今者獨作此歸我之性命云何而存王師答言我奉王勅尋求太子便至跋伽仙人住處訪見太子仙人語我太子所在并說太子所言之事我便前行而於中路遇見太子在於樹下端坐思惟相好光明踰於日月即向太子具說大王摩訶波闍波提及耶輸陀羅憂苦之情太子即以

深重之聲而見答言我豈不知父王親戚恩情深耶但畏生死愛別離苦爲欲斷除故來此耳如是種種言詞所說志意堅固如須彌山不可移動捨我而去如棄草芥爾時即便選擇五人隨從給侍伺察所在所遣人中有

一人還說言太子當至阿羅邏迦蘭仙人之所路由恒河以天神力而得度水至王舍城時頻毗娑羅王來詣太子方便譬說不應出家分國共治及以全與并欲與兵令伐他國太子亦復皆悉不受即又前行達仙人所而爲說法降伏其心又至伽闍山苦行林中尼連禪河側靜坐思惟日食一麻一米爾時白淨王聞王師大臣說彼使人如此語已心大悲惱舉體顫掉身毛皆豎即語王師及大臣言太子遂捨轉輪王位父母親屬恩愛之樂

尺七

九

遠在深山修此苦行我今薄福生失如此珍寶之子王即復以使人所言向摩訶波闍波提及耶輸陀羅而爲說之時白淨王即便嚴駕五百乘車摩訶波闍波提及耶輸陀羅亦復相與辦五百乘一切資生皆悉具足即喚車匿而語之言汝送太子遠放深山今復令汝領此千乘載致資糧送與太子隨時供養勿使乏少盡更來請車匿受勅即領千乘疾速而去至太子所見形消瘦皮骨相連血脉悉現如波羅奢華頭面禮足悶絕於地良久乃起銜淚而言大王憶念太子不捨日夜今故遣我領此千乘載資生具以餉太子于時太子答車匿言我違父母及捨國土遠來在此爲求至道云何當復受此餉耶爾時車匿聞此語已心自思惟太子今者既不肯受如

此資供我當別覓一人領此千乘還歸王所我住於此奉事太子即差一人領車而去於是車匿密侍太子不離晨昏爾時太子心自念言我今日食一麻一米乃至七日食一麻一米身形消瘦有若枯木修於苦行垂滿六年不得解脫故知非道不如昔在閻浮樹下所思惟法離欲寂靜是最真正今我若復以此羸身而取道者彼諸外道當言自餓是般涅槃因我今雖復節節有那羅延力亦不以此而取道果我當受食然後成道作是念已即從座起至尼連禪河入水洗浴洗浴既畢身體羸瘠不能自出天神來下爲案樹枝得攀出池時彼林外有一牧牛女人名難陀波羅時淨居天來下勸言太子今者在於林中汝可供養女人聞已心大歡喜于時地中自然

而生千葉蓮華上有乳糜女人見此生奇特
心即取乳糜至太子所頭面禮足而以奉上
太子即便受彼女施而呪願之今所施食欲
令食者得充氣力當使施家得色得力得捨
得喜安樂無病終保年壽智慧具足太子即
復作如是言我爲成熟一切衆生故受此食
呪願訖已即受食之身體光悅氣力充足堪
受菩提爾時五人既見此事驚而怪之謂爲
退轉各還所住菩薩獨行趣畢波羅樹自發
願言坐彼樹下我道不成要終不起菩薩德
重地不能勝于時步步地爲震動出大音聲
爾時盲龍聞地動響心大歡喜兩目開明曾
見先佛有此瑞應作是念已從地涌出禮菩
薩足時有五百青雀飛騰虛空右遶菩薩雜
色瑞雲及以香風而隨映拂爾時盲龍以偈

讚曰

菩薩足踐處 地皆六種動 發大深遠音
我聞眼開明 又見虛空中 青雀遶菩薩
瑞雲極鮮映 香風甚清涼 此等諸瑞相
悉同過去佛 以是知菩薩 必定成正覺
於是菩薩即自思惟過去諸佛以何爲座成
無上道即便自知以草爲座釋提桓因化爲
凡人執淨軟草菩薩問言汝名何等答名吉
祥菩薩聞之心大歡喜我破不吉以成吉祥
菩薩又言汝手中草此可得不於是吉祥即
便授草以與菩薩因發願言菩薩道成願先
度我菩薩受已敷以爲座而於草上結跏趺
坐如過去佛所坐之法而自誓言不成正覺
不起此座我亦如是發此誓時天龍鬼神皆
悉歡喜清涼好風從四方來禽獸息響樹不

鳴條遊雲飛塵皆悉澄淨知是菩薩必成道
相爾時菩薩在於樹下發誓言時天龍八部
皆悉歡喜於虛空中踊躍讚歎時第六天魔
王宮殿自然動搖於是魔王心大懊惱精神
躁擾聲味不御而自念言沙門瞿曇今在樹

下捨於五欲端坐思惟不久當成正覺之道
其道若成廣度一切超越我境及道未成往
壞亂之爾時魔子薩陀見父慘悴而往白言
不審父王何故憂感魔王答言沙門瞿曇今
在樹下其道將成超越於我今欲壞之魔子
即便前諫父言菩薩清淨超出三界神通智
慧無不明了天龍八部咸共稱讚此非父王
所能摧屈不煩造惡自招禍咎魔王三女形
容儀貌極爲端正妖冶巧媚善能惑人於天
女中最爲第一熏以名香佩好瓔珞一名捺

欲二名能悅人三名可愛樂三女俱前白其
父言不審今者何故憂愁父即寫心語諸女
言世間今有沙門瞿曇身被法鎧執自在弓
鏃智慧箭欲伏衆生壞我境界我若不如衆
生信彼皆悉歸依我土則空是故愁耳及未
成道欲往摧挫壞其橋梁於是魔王手執強
弓又持五箭男女眷屬俱時往彼畢波羅樹
下見於牟尼寂然不動欲度生死三有之海
爾時魔王左手執弓右手調箭語菩薩言汝
刹利種死甚可畏何不速起宜應修汝轉輪
王業捨出家法習於施會得生天樂此道第
一先聖所行汝是刹利轉輪王種而爲乞士
此非所應今若不起但好安坐勿捨本誓我
試射汝一放利箭苦行仙人聞我箭聲莫不
驚怖昏迷失性況汝瞿曇能堪此毒汝若速

起可得安全魔說是語以怖菩薩菩薩怡然
不驚不動魔王即便挽弓放箭并進天女菩
薩爾時眼不視箭箭停空中其鏃向下變成
蓮華時三天女白菩薩言仁者至德人天所
敬應有供侍我等今者在盛時天女端正
無踰我者天今遣我以相供給八七晨昏寢卧願
侍左右菩薩答言汝植小善得爲天身不念
無常而作妖媚形體雖美而心不端姪惑不
善死必當墮三惡道中受鳥獸身免之甚難
汝等今者欲亂定意非清淨心今便可去吾
不相須時三天女變成老姥頭白面皺齒落
垂涎肉消骨立腹大如鼓拄杖羸步不能自
復魔王既見如是堅固心自思惟我昔曾於
雪山之中射摩醯首羅即便恐懼退其善心
而今不辯動於瞿曇既非比箭及我三女所

能移轉今生憂患當復更作他餘方便即以
軟語誘菩薩言汝若不樂人間受樂今者便
可上昇天宮我捨天位及五欲具悉持與汝
菩薩答言汝於先世修少施因今故得爲自
在天王此福有期要還下生沉溺三塗出濟
甚難此爲罪因非我所須魔語菩薩我之果
報是汝所知汝之果報誰復知者菩薩答言
我之果報唯此地知說此語已于時大地六
種震動於是地神持七寶瓶滿中蓮華從地
涌出而語魔言菩薩昔以頭目髓腦以施於
人所出之血浸潤大地國城妻子象馬珍寶
而用布施不可稱計爲求無上正真之道以
是之故汝今不應惱亂菩薩魔聞是已心生
怖懼身毛皆豎時彼地神禮菩薩足以華供
養忽然不現爾時魔王即自思惟我以強弓

利箭并及三女兼以方便和言誘之不能壞
亂此瞿曇心今當更設諸種方便廣集軍衆
以力迫憊作是念時其諸軍衆忽然來至充
滿虛空形貌各異或執戟操劍頭戴大樹手
執金杵種種戰具皆悉備足或猪魚驢馬師

尺七

十四

子龍頭熊羆虎兇及諸獸頭或一身多頭或
面各一目或衆多目或大腹長身或羸瘦無
腹或長脚大膝或大脚肥腩或長牙利爪或
頭在肩前或兩足多身或大面傍面或色如
灰土或身放烟焰或象耳擔山或被髮裸形
或復面色半赤半白或脣垂至地或上褰覆
面或身著虎皮或師子蛇皮或蛇遍纏身或
頭上火然或瞋目怒臂或傍行跳躑或空中
旋轉或馳步吼嚇有如是等諸惡類形不可
稱數圍遶菩薩或復有欲裂菩薩身或四方

烟起火焰衝天或狂風奮發震動山谷風火
烟塵暗無所見四大海水一時涌沸護法天
人諸龍鬼等悉忿魔衆瞋恚增盛毛孔血流
淨居天衆見此惡魔惱亂菩薩以慈悲心而
愍傷之於是來下塲塞虛空見魔軍衆無量

尺七

十五

無邊圍遶菩薩發大惡聲震動天地菩薩心
定顏無異相猶如師子處於鹿羣皆悉歎言
嗚呼奇哉未曾有也菩薩決定當成正覺是
諸魔衆互相催切各盡威力摧破菩薩或角
目切齒或橫飛亂擲菩薩觀之如童子戲魔
益忿懟更增戰力菩薩以慈悲力故令抱石
者不能勝舉其勝舉者不能得下飛刀舞劍
停於空中雷電雨火成五色華惡龍吐毒變
成香風諸惡類形欲毀菩薩不能得動魔有
姊妹一名彌伽二名迦利各各以手執觸體

器在菩薩前作諸異狀惱亂菩薩是諸魔衆種種醜身欲怖菩薩終不能動菩薩一毛魔益憂愁空中有神名曰負多隱身而言我於今者見牟尼尊心意泰然無怨恨想是諸魔衆起於毒心於無怨處而橫生忿是癡惡魔徒自疲勞求無所得今日宜應捨害害心汝口乃可吹須彌山今其崩倒火可令冷水可令熱地性堅強可令柔軟汝不能壞菩薩歷劫修習善果正思惟定精勤方便淨智慧光此四功德無能斷截爲作留難不成正覺如千日照必能除闇鑽木得火穿地得水精勤方便無求不得世間衆生沒於三毒無有救者菩薩慈悲求智慧藥爲世除患汝今云何而惱亂之世間衆生癡惑無智悉著邪見今設法眼修習正路欲導衆生汝今云何惱亂

導師是則不可譬如在於曠野之中而欲欺誑實人導師衆生墮大黑闇之中茫然不知所止住處菩薩爲然大智慧燈汝今云何欲吹令滅衆生今者沒生死海菩薩爲修智慧寶船汝今云何欲令沉溺忍辱爲芽堅固爲根無上大法以爲大果汝今云何而欲攻伐貪恚癡鎖縛諸衆生菩薩苦行欲爲解之今日決定於此樹下結跏趺坐成無上道此地乃是過去諸佛金剛之座餘方悉轉斯處不動堪受妙定非汝所摧汝今宜應生欣慶心息憍慢意修十六知識想而奉事之是時魔王聞空中聲又見菩薩恬然不異魔心慙愧捨離憍慢即便復道還歸天宮羣魔憂惑悉皆崩散情意沮悴無復威武諸鬪戰具縱橫林野當於惡魔退散之時菩薩心淨湛然不動天

無烟霧風不搖條落日停光倍更明盛澄月
映徹衆星燦朗幽隱闇暝無復障礙虛空諸
天雨妙華香作衆妓樂供養菩薩爾時菩薩
以慈悲力於二月七日夜降伏魔已放大光
明即便入定思惟真諦於諸法中禪定自在
悉知過去所造善惡從此生彼父母眷屬貧
富貴賤壽夭長短及名姓字皆悉明了即於
衆生起大悲心而自念言一切衆生無救濟
者輪迴五道不知出津皆悉虛偽無有真實
而於其中橫生歡樂作是思惟至初夜盡爾
時菩薩既至中夜即得天眼觀察世間皆悉
徹見如明鏡中自覩面像見諸衆生種類無
量死此生彼隨行善惡受苦樂報見地獄中
拷治衆生或鎔銅灌口或抱銅柱或卧鐵牀
或以鐵鑊而煎煮之或於火上而加弗炙或

爲虎狼鷹犬所食或有避火依於樹下樹葉
墜落皆成刀劒割截其身或以斧鋸解剔肢
體或擲熱沸灰河之中或復擲於糞屎坑中
受如是等種種諸苦以業報故命終不死菩
薩既見如此事已而心思惟此等衆生本造
惡業爲世樂故而今得果極爲大苦若人有
見如此惡報無復更應作不善想爾時菩薩
復觀畜生隨種種行受雜醜形或復有爲骨
肉筋角皮牙毛羽而受殺者或復爲人負荷
重擔飢渴之極人無知者或穿其鼻或鈎其
首常以身肉而供於人還與其類更相食噉
受於如是種種之苦菩薩既見生大悲心即
自思惟斯等衆生恒以身力而供於人又加
楚撻飢渴之苦皆是本修惡行果報爾時菩
薩次觀餓鬼見其恒居黑闇之中未曾暫覩

日月之光還是其類亦不相見受形長大腹如太山咽頸若針口中恒有大火熾然常爲飢渴之所焦迫千億萬歲不聞食聲設值天雨灑其身上變爲火珠或時遇臨江海河池水卽化爲熱銅焦炭動身舉步聲如人牽五

百乘車肢體節節皆悉火然菩薩旣見受如是等種種諸苦起大悲心而自思惟斯等皆爲本造慳貪積財不施故令今者受斯罪報若人見彼受此苦痛宜應惠施勿生恡惜設使無財亦應割肉以用施人爾時菩薩次復觀人見從中陰始欲入胎父母和合以顛倒想起於愛心卽以不淨而爲己身旣處胎已在於生熟二臟之間熏炙身體如地獄苦至滿十月然後方生初生之時而爲外人之所抱執羸涇苦痛如被刀劒如是不久復歸老

死更爲嬰兒尺七輪轉五道不能自悟菩薩見已起大悲心而自思惟衆生皆有如斯之患云何於中耽著五欲橫計爲樂而不能斷顛倒根本爾時菩薩次觀諸天見彼天子其身清淨不受塵垢如真瑠璃有大光明兩目不瞬或有居在須彌山頂或復居在須彌四鎮或復居在虛空之中心常歡悅無不適事奏天美樂以自娛樂不識晝夜四方諸趣無不絕妙視東耽著彌歲忘轉瞻西耽湏經年不迴乃至南北皆亦如是飲食衣服應念卽至雖有如此適意之事猶爲欲火之所煎焦又見彼天福盡之時五死相現一者頭上華萎二者眼瞬三者身上光滅四者腋下汗出五者自然離於本座其諸眷屬見天子身五死相現心生戀慕天子亦復自見己身有五死相

又見眷屬戀慕於已當爾之時生大苦惱菩薩既見彼諸天子有如此事起大悲心而自思惟此諸天子本修少善得受天樂果報將盡生大苦惱既命終已捨彼天身或有墮於三惡道中本造善行爲求樂報而今所得少

天七

十九

樂多苦譬如飢人取雜毒食初雖爲美終成大患云何智者貪樂此耶色無色界諸天不見壽命長短便謂常樂既見變壞生大苦惱即起邪見謗無因果以此事故輪迴三塗備受諸苦菩薩以天眼力觀察五道起大悲心而自思惟三界之中無有一樂如是思惟至中夜盡爾時菩薩至第三夜觀衆生性以何因緣而有老死即知老死以生爲本若離於生則無老死又復此生不從天生不從自生非無緣生從因緣生因於欲有色有無色有

業生又觀三有業從何而生即知三有業從四取生又觀四取從何而生即知四取從愛而生又復觀愛從何而生即便知愛從受而生又復觀受從何而生即便知受從觸而生又復觀觸從何而生即便知觸從六入生又觀六入從何而生即知六入從名色生又觀名色從何而生即知名色從識而生又復觀識從何而生即便知識從行而生又復觀行從何而生即便知行從無明生若滅無明則行滅行滅則識滅識滅則名色滅名色滅則六入滅六入滅則觸滅觸滅則受滅受滅則愛滅愛滅則取滅取滅則有滅有滅則生滅生滅則老死憂悲苦惱滅如是逆順觀十二因緣第三夜分破於無明明相出時得智慧光斷於習障成一切種智爾時如來心自思

惟八正聖道是三世諸佛之所履行趣般涅槃路我今已踐智慧通達無所罣礙于時大地十八相動遊雲飛塵皆悉澄淨天鼓自然而發妙聲香風徐起柔軟清涼雜色瑞雲降甘露雨園林華果榮不待時又雨曼陀羅華摩訶曼陀羅華^{八七}曼殊沙華^{二十}摩訶曼殊沙華金華銀華瑠璃等華七寶蓮華繞菩提樹滿三十六踰闍那是時諸天作天妓樂散華燒香歌唄讚歎執天寶蓋及以幢幡充塞虛空供養如來龍神八部所設供養亦復如是當爾之時一切衆生皆悉慈愛無瞋害想歡喜踊躍如見聖跡無怖畏情其心調柔離憍慢意亦無慳嫉諂誑之心五淨居天離喜樂相亦皆歡悅不能自勝地獄苦痛暫得休息生大歡喜一切畜生相食噉者無復惡心餓鬼飽

滿無飢渴想世界之中幽闇之處日月威光所不能照而皆大明其中衆生悉得相見各作是言此中云何忽有衆生大聖法王出興於世以大法光破非法闇故今一切皆悉明朗甘蔗先王棄國學道得五通仙又行十善得生天者皆乘神通到菩提樹在虛空中歡喜合掌而讚歎言於我甘蔗種族之中能斷諸漏成一切智爲世間眼甚爲奇特一切莫不歡喜踊躍唯有魔王心獨憂愁爾時如來於七日中一心思惟觀於樹王而自念言我^{八七}在此處盡一切漏所作已竟本願成滿我所得法甚深難解唯佛與佛乃能知之一切衆生於五濁世爲貪欲瞋恚愚癡邪見憍慢諂曲之所覆障薄福鈍根無有智慧云何能解我所得法今我若爲轉法輪者彼必迷惑不

能信受而生誹謗當墮惡道受諸苦痛我寧
默然入般涅槃爾時如來以偈頌曰

聖道甚難登 智慧果難得 我於此難中

皆悉已能辦 我所得智慧 微妙最第一

衆生諸根鈍 著樂癡所盲 順於生死流

不能反其源 如斯之等類 云何而可度

爾時如來作此念已大梵天王見於如來聖

果已成默然而住不轉法輪心懷憂惱即自

念言世尊昔於無量億劫爲衆生故久在生

死捨國城妻子頭目髓腦備受衆苦始於今

者所願滿足成阿耨多羅三藐三菩提云何

默然而不說法衆生長夜沉沒生死我今當

往請轉法輪作是念已即發天宮猶如壯士

屈伸臂頃至如來所頭面禮足遶百千匝却

住一面胡跪合掌而白佛言世尊往昔爲衆

生故久住生死捨身頭目以用布施備受諸
苦廣修德本始於今者成無上道云何默然
而不說法衆生長夜沒溺生死墮無明暗出
期甚難然有衆生過去世時親近善友植諸
德本堪任聞法受於聖道唯願世尊爲斯等
故以大悲力轉妙法輪釋提桓因乃至他化
自在天亦復如是勸請如來爲諸衆生轉大
法輪爾時世尊答大梵王及釋提桓因等言
我亦欲爲一切衆生轉於法輪但所得法微
妙甚深難解難知諸衆生等不能信受生誹
謗心墮於地獄我今爲此故默然耳時梵天
王等乃至三請爾時如來至滿七日默然受
之梵天王等知佛受請頭面禮足各還所住
爾時世尊受梵王等請已又於七日而以佛
眼觀諸衆生上中下根及諸煩惱亦下中上

滿二七日爾時世尊又復思惟我今當開甘露法門誰應在先而得聞者阿羅邏仙人聰慧易悟又先發願道成度我作是念時空中有言阿羅邏仙人昨夜命終爾時世尊即復答彼空中聲言我亦知其昨夜命終又自思惟迦蘭仙人利根明了亦應先聞空中又言迦蘭仙人昨夜命終爾時世尊即復答言我亦知其昨夜命終爾時世尊又自思惟彼王師大臣所遣憍陳如等五人瞻視我者皆悉聰明又過去世於我發願應先聞法我今宜當爲此五人先開法門又自思惟古昔諸佛轉法輪處皆悉在於波羅奈國鹿野苑中仙人住處又此五人所止住處亦在於彼我今應往至其住處轉大法輪思惟是已即從座起詣波羅奈國爾時有五百賣人二人爲主

一名跋陀羅斯那二名跋陀羅利行過曠野尺七時有天神而語之言有如來應供正遍知明行足善逝世間解無上士調御丈夫天人師佛世尊出興於世最上福田汝今宜應最前設供時彼賣人聞天語已即答之曰善哉如告又問天言世尊今者爲在何許天又報言世尊不久當來至此於是如來與無量諸天前後導從到多謂婆跋利村時彼賣人既見如來威相莊嚴又見諸天前後圍遶倍生歡喜即以蜜麩而奉上佛爾時世尊心自思惟過去諸佛用鉢多羅而以盛食時四天王知佛心念各持一鉢來至佛所而以奉上於是世尊而自念言我今若受一王鉢者餘王必當生於恨心即便普受四王之鉢累置掌上按令成一使四際現爾時世尊即便呪願今

所布施欲令食者得充氣力當令施者得色
得力得捨得喜安快無病終保年壽諸善鬼
神恒隨守護飯食布施斷三毒根將來當獲
三堅法報聰明智慧篤信佛法在在所生正
見不昧現世之中父母妻子親戚眷屬皆悉
熾盛無諸災怪不吉祥事門族之中若有命
過墮惡道者當令以今所施之福還生人天
不起邪見增進功德常得奉近諸佛如來得
聞妙說見諦得證所願具足爾時世尊呪願
訖已即便受食食既畢竟漂漱洗鉢即授賣
人三歸一歸依佛二歸依法三歸依將來僧
授三歸竟因與之別而便前行威儀庠序步
若鵝王路逢外道名優波伽既見如來相好
莊嚴諸根寂定歎爲奇特即說偈言
世間諸衆生 皆爲三毒縛 諸根又輕躁

馳蕩於外境 而今見仁者 諸根極寂靜
必到解脫地 決定無有疑 仁者所學師
其姓字何等
爾時世尊以偈答曰
我今已超出 一切衆生表 微妙深遠法
我今已具知 三毒五欲境 永斷無餘習
如蓮華在水 不染濁水泥 自悟入正道
無師無等侶 以清淨智慧 降伏大力魔
今得成正覺 堪爲天人師 身口意滿足
故號爲牟尼 欲赴波羅柰 轉甘露法輪
是天人魔梵 所可不能轉
爾時優波伽聞此偈言心生歡喜歎未曾有
合掌恭敬圍遶而去迴顧瞻矚不見乃止爾
時世尊即復前行次到阿闍婆羅水側日暮
止宿而便入定當於爾時七日風雨時彼水

中有大龍王名目真隣陀見佛入定即以其身圍遶七匝滿七日已時彼龍王化爲人形頭面禮足而白佛言世尊在此七日之中不至乃甚患風雨耶爾時世尊以偈答曰

諸天及世人 所歡於五欲 比我禪定樂

不可爲譬喻

尺七

十五

時彼龍王聞佛此偈歡喜踊躍頭面禮足還歸所止爾時世尊即復前行往波羅柰國至憍陳如摩訶那摩跋波阿捨婆闍跋陀羅闍所止住處時彼五人遙見佛來共相謂言沙門瞿曇棄捨苦行而還退受飲食之樂無復道心今旣來此我等不煩起迎之也亦勿作禮敬問所須爲敷坐處若欲坐者自隨其意作此語竟而各默然爾時世尊來旣至已五人不覺各從座起禮拜奉迎互爲執事或復

有爲持衣鉢者或有取水供盥漱者或復有爲澡洗脚者各違本誓猶故稱佛以爲瞿曇爾時世尊語憍陳如言汝等共約見我不起今者何故違先所誓而即驚起爲我執事時彼五人聞佛此語深生慙愧即前白言瞿曇行道得無疲倦爾時世尊語五人言汝等云何於無上尊而以高情稱喚姓耶我心如空於諸毀譽無所分別但汝憍慢自招惡報譬如子稱父母名於世儀中猶尚不可況我今是一切父母時彼五人又聞此語倍生慙愧而白佛言我等愚癡無有智慧不知今者已成正覺所以者何徃見如來日食麻米苦行六年而今還受飲食之樂我以是故謂不得道爾時世尊語憍陳如言汝等莫以小智輕量我道成與不成何以故形在苦者心則

惱亂身在樂者情則樂著是以苦樂兩非道
因譬如鑽火澆之以水則必無有破暗之照
鑽智慧火亦復如有苦樂水慧光不生以
不生故不能滅於生死黑障今者若能棄捨
苦樂行於中道心則寂定堪能修彼八正聖

尺七

尺六

道難於生老病死之患我已隨順中道之行
得成阿耨多羅三藐三菩提時彼五人既聞
如來如此之言心大歡喜踊躍無量瞻仰尊
顏目不暫捨爾時世尊觀五人根堪任受道
而語之言憍陳如汝等當知五盛陰苦生苦
老苦病苦死苦愛別離苦怨憎會苦所求不
得苦失榮樂苦憍陳如有形無形無足一足
二足四足多足一切衆生無不悉有如此苦
者譬如以灰覆於火上若遇乾草還復燒然
如是諸苦由我爲本若有衆生起微我想還

復更受如此之苦貪欲瞋恚及以愚癡皆悉
緣我根本而生又此三毒是諸苦因猶如種
子能生於芽衆生以是輪迴三有若滅我想
及貪瞋癡諸苦亦皆從此而斷莫不悉由彼
八正道如人以水澆於盛火一切衆生不知
諸苦之根本者皆悉輪迴在於生死憍陳如
苦應知集當斷滅應證道當修憍陳如我已
知苦已斷集已證滅已修道故得阿耨多羅
三藐三菩提是故汝今應當知苦斷集證滅
修道若人不知四聖諦者當知是人不得解
脫四聖諦者是真是實是苦實是苦集實是
集滅實是滅道實是道憍陳如汝等解未憍
陳如言解已世尊知已世尊以於四諦得解
知故故名阿若憍陳如當佛三轉四諦十二
行法輪時阿若憍陳如於諸法中遠塵離垢

尺七

尺七

得法眼淨時虛空中八萬那由他諸天亦離塵垢得法眼淨爾時地神見於如來在其境界而轉法輪心大歡喜高聲唱言如來於此轉妙法輪虛空天神既聞此言又生踊躍展轉唱聲乃至阿迦膩咤天諸天聞已欣悅無量高聲唱言如來今日於波羅柰國鹿野苑中仙人住處轉大法輪一切世間天人魔梵沙門婆羅門所不能轉爾時大地十八相動天龍八部於虛空中作衆妓樂天鼓自鳴燒衆名香散諸妙華寶幢幡蓋歌唄讚歎世界之中自然大明阿若憍陳如於弟子中以始悟故爲第一弟子時彼摩訶那摩等四人聞佛轉法輪已阿若憍陳如獨悟道跡心自念言世尊若更爲我說法我等亦當復得悟道作此念已瞻仰尊顏目不暫捨爾時世尊知

四人念即便重爲廣說四諦于時四人於諸法中亦離塵垢得法眼淨時彼五人見道跡已頂禮佛足而白佛言世尊我等五人已見道跡已證道跡我等今者欲於佛法出家修道唯願世尊慈愍聽許於時世尊喚彼五人善來比丘鬚髮自落袈裟著身即成沙門爾時世尊問彼五人汝等比丘知色受想行識爲是常爲無常耶爲是苦爲非苦耶爲是空爲非空耶爲有我爲無我耶時五比丘聞佛說是五陰法已漏盡意解成阿羅漢果即便

八十七

二十八

答言世尊色受想行識實是無常苦空無我於是世間始有六阿羅漢佛阿羅漢是爲佛寶四諦法輪是爲法寶五阿羅漢是爲僧寶如是世間三寶具足爲諸天人第一福田過去現在因果經卷第三

音釋

獎子兩切 縱規縣切 胃網也切 餉式亮切 羸亮切 瘡羸倫切
爲切瘡秦昔切 鎧可亥切 族作木切 憎紫迄切
羸瘡瘦弱也 裸郎果切 躑直炙切 赫郝格切
相切以威力 裸郎果切 躑直炙切 赫郝格切
塼塞塼察色切 過遮也 對徒對切 弗弗楚切
限切燔肉器也 剔他歷切 唄薄邁切
之石切 炮肉也 炙解也 唄梵音也

過去現在因果經卷第四

尺八

宋三藏求那跋陀羅譯

爾時有長者子名曰耶舍聰明利根極大巨富閻浮提中最爲第一服天冠瓔珞著無價之寶履其於中夜與諸妓女相娛樂已各還寢息忽從眠覺見諸妓女或有伏卧或有仰眠頭髮蓬亂涎唾流出樂器服玩顛倒縱橫既見是已生厭離心而自念言我今在此灾怪之內於不淨中妄生淨想作是念時以天力故空中光明門自然開尋光而去趣鹿野苑路由恒河高聲唱言苦哉怪哉佛言耶舍汝便可來我此今有離苦之法耶舍聞已所著寶履價直閻浮提即便脫之度於恒河往詣佛所見三十二相八十種好顏容挺特威德具足心大歡喜踊躍無量五體投地頂禮

佛足唯願世尊救濟於我佛言善哉善男子諦聽諦聽善思念之如來即便隨順其根而爲說法耶舍色受想行識無常苦空無我汝知之不是時耶舍聞說此語即於諸法遠塵離垢得法眼淨於是如來重說四諦漏盡意解心得自在成阿羅漢果即答佛言世尊色受想行識實是無常苦空無我爾時如來猶見耶舍著嚴身具即說偈言
雖復處居家 服寶嚴身具 善攝諸情根 厭離於五欲 若能如此者 是爲真出家
雖身在曠野 服食於麤澀 意猶貪五欲 是爲非出家 一切造善惡 皆從心想生 是故真出家 皆以心爲本
爾時耶舍既聞如來說此偈已心自念言世尊所以說此偈者正當以我猶著七寶我今

宜應脫如此服即便禮足而白佛言唯願世尊聽我出家佛言善來比丘髮鬚自落袈裟著身即成沙門爾時耶舍父既至天曉求覓耶舍不知所在心大懊惱悲號涕泣緣路推尋到恒河側見其子履心自思惟我子正當

尺八

從此道去即尋其跡至於佛所爾時世尊知其爲子故來至此若使即得見耶舍者必生大苦或能命終便以神力隱耶舍身其父即便前到佛所頭面禮足退坐一面於是如來即隨其根而爲說法善男子色受想行識無常苦空無我汝知之不時耶舍父聞說此言即於諸法遠塵離垢得法眼淨而答佛言世尊色受想行識實是無常苦空無我爾時如來既已知其見於道跡恩愛漸薄而問之言汝何因緣而來至此其即答言我有一子名

曰耶舍昨夜之中忽失所在今但推求見其寶履在恒河側追尋之跡故來至此爾時世尊攝其神力其父即便得見耶舍心大歡喜語耶舍言善哉善哉汝爲此事真實快也既能自度又能度他汝今在此故令我來得見道跡即於佛前受三自歸於是閻浮提中唯此長者爲優婆塞最初獲得供養三寶爾時又有耶舍朋類五十長者子聞佛出世又聞耶舍於佛法中出家修道各自念言世間今者有無上尊長者子耶舍聰慧辯了才藝兼人乃能捨其豪族棄五欲樂毀形守志而爲沙門我等今者復何顧戀不出家耶作是念已共詣佛所未至之間遙見如來相好殊特光明赫弈心大歡喜舉體清涼敬情轉至即前佛所合掌圍遶頭面禮足諸長者子宿植

尺八

三

德本聰達易悟如來即便隨其所應而爲說法善男子色受想行識無常苦空無我汝知之不說此語已諸長者子於諸法中遠塵離垢得法眼淨即答佛言世尊色受想行識實是無常苦空無我唯願世尊聽我出家佛言善來比丘鬚髮自落袈裟著身即成沙門爾時世尊又爲廣說四諦時五十比丘漏盡意解得阿羅漢果爾時始有五十六阿羅漢是時如來告諸比丘汝等所作已辦堪爲世間作上福田宜各遊方教化以慈悲心度諸衆生我今亦當獨往摩竭提國王舍城中度諸人民諸比丘言善哉世尊爾時比丘頭面禮足各持衣鉢辭別而去爾時世尊即便思惟我今應度何等衆生而能廣利一切人天唯有優樓頻螺迦葉兄弟三人在摩竭提國學

於仙道國王臣民皆悉歸信又其聰明利根易悟然其我慢亦難摧伏我今當往而度脫之思惟是已即發波羅柰趣摩竭提國日將昏暮往優樓頻螺迦葉住處于時迦葉忽見如來相好莊嚴心大歡喜而作是言年少沙門從何所來佛即答言我從波羅柰國當詣摩竭提日既晚暮欲寄一宿迦葉又言寄宿止者甚不相違但諸房舍悉弟子住唯有石室極爲潔淨我事火具皆在其中此寂靜處可得相容然有惡龍居在其內恐相害耳佛又答言雖有惡龍但以見借迦葉又言其性兇暴必當相害非是有惜佛又答言但以見借必無辱也迦葉又言若能住者便自隨意佛言善哉即於其夕而入石室結跏趺坐而入三昧爾時惡龍毒心轉盛舉體烟出世尊

即入火光三昧龍知是已火焰衝天焚燒石室迦葉弟子先見此火而還白師彼年少沙門聰明端嚴今爲龍火之所燒害迦葉驚起見彼龍火心懷悲傷即勅弟子以水澆之水不能滅火更熾盛石室融盡爾時世尊身心不動容顏怡然降彼惡龍使無復毒授三歸依置於鉢中至天明已迦葉師徒俱往佛所年少沙門龍火猛烈將無爲此之所傷耶沙門借室我昨所以不相與者正爲此耳佛言我內清淨終不爲彼外灾所害彼毒龍者今在鉢中即便舉鉢以示迦葉迦葉師徒見於沙門處火不燒降惡毒龍置於鉢中歎未曾有語弟子言年少沙門雖復神通然故不如我道真也爾時世尊語迦葉言我今方欲停止此處迦葉答言善哉隨意是時如來於第

二夜坐一樹下時四天王夜來佛所而共聽法各放光明照踰日月迦葉夜起遙見天光在如來側語弟子言年少沙門亦事於火至明日曉往詣佛所問言沙門汝事火耶佛言不也有四天王夜來聽法是其光耳於是迦葉語弟子言年少沙門有大神德然故不如我道真也至第三夜釋提桓因來下聽法放大光明如日初昇迦葉弟子遙見天光在如來側而白師言年少沙門定事火也至於明日往詣佛所問沙門言汝定事火佛言不也釋提桓因來下聽法是其光耳于時迦葉語弟子言年少沙門神德雖盛然故不如我道真也至第四夜大梵天王來下聽法放大光明如日正中迦葉夜起見有光明在如來側沙門必定事於火也明日問佛汝定事火佛

言不也大梵天王夜來聽法是其光耳於是
迦葉心自念言年少沙門雖復神妙然故不
如我道真也爾時迦葉五百弟子各事三火
於晨朝時俱欲然火火不肯然皆向迦葉具
說此事迦葉聞已心自思惟此必當是沙門

所爲即與弟子來至佛所而白佛言我諸弟
子各事三火旦欲然之而火不然佛即答言
汝可還去火自當然迦葉便還見火已然心
自念言年少沙門雖復神妙然故不如我道
真也諸弟子衆供養火畢而欲滅之不能令
滅即向迦葉具說此事迦葉聞已心自思惟
此亦當是沙門所爲即與弟子來至佛所而
白佛言我諸弟子朝欲滅火而火不滅佛即
答之汝可還去火自當滅迦葉便歸見火已
滅心自念言年少沙門雖復神妙然故不如

我道真也爾時迦葉自事三火晨朝欲然火
不肯然即自思惟此必復是沙門所爲即往
佛所而白佛言我朝然火而不肯然佛即答
言汝可還去火自當然迦葉便歸見火已然
心自念言年少沙門雖復神妙然故不如我
道真也於時迦葉供養火畢而欲滅之不能
令滅心自思惟此必當是沙門所爲即往佛
所而白佛言我朝然火今欲滅之而不肯滅
佛即答言汝可還去火自當滅迦葉便歸見
火已滅心自念言年少沙門雖復神妙然故
不如我道真也爾時迦葉諸弟子衆晨朝破
薪斧不肯舉即向迦葉具說此事迦葉聞已
心自思惟此必復是沙門所爲即與弟子來
至佛所而白佛言我諸弟子朝欲破薪斧不
肯舉佛即答言汝可還去斧自當舉迦葉便

歸見諸弟子斧皆得舉而自念言年少沙門
雖復神妙然故不如我道真也迦葉弟子即
得舉斧復不肯下還向迦葉具說此事迦葉
聞已心自思惟此亦當是沙門所爲即與弟
子往至佛所而白佛言我諸弟子^六旦欲破薪
斧既得舉復不肯下佛即答言汝可還去當
令斧下迦葉既歸見諸弟子斧皆得下心自
念言年少沙門雖復神妙然故不如我道真
也爾時迦葉於晨朝時自欲破薪斧不得舉
心自思惟此亦當是沙門所爲即詣佛所而
白佛言我旦破薪斧不肯舉佛即答言汝可
還去斧自當舉迦葉既還斧即得舉心自念
言年少沙門雖復神妙然故不如我道真也
迦葉斧既舉已又不肯下心自思惟此亦當
是沙門所爲即詣佛所而白佛言我斧已舉

復不肯下佛即答言汝可還去斧自當下迦
葉即歸斧即得下心自念言年少沙門雖復
神妙然故不如我道真也爾時迦葉即白佛
言年少沙門可止住此共修梵行房舍衣食
我當相給于時世尊默然許之迦葉知佛許
已還其所住即勅日日辦好飲食并施牀座
至明食時自行請佛佛言汝去我隨後往迦
葉適去俄爾之間世尊即便至閻浮洲取閻
浮果滿鉢持來迦葉未至佛已先到迦葉後
來見佛已坐即便問言年少沙門從何道來
而先至此佛以鉢中閻浮果以示迦葉而語
之言汝今識此鉢中果不迦葉答言不識此
果佛言從此南行數萬踰闍那彼有一洲其
上有樹名曰閻浮緣有此樹故言閻浮提我
此鉢中是彼果也於一念頃取此果來極爲

香美汝可噉之於是迦葉心自思惟彼道去此極爲長遠而此沙門乃能俄爾已得往還神通變化殊自迅疾然故不如我道真也迦葉即便下種種食佛即呪願

婆羅門法中 奉事火爲最 一切衆流中

大海爲其最 於諸星宿中 月光爲其最

一切光明中 日照爲其最 於諸福田中

佛福田爲最 若欲求大果 當供佛福田

佛食已畢還歸所住洗鉢漱口坐於樹下明

日食時復往請佛佛言汝去我隨後往迦葉

適去俄爾之間世尊即便至弗婆提取菴摩

羅果滿鉢持來迦葉未至佛已先到迦葉後

來見佛已坐即便問言年少沙門從何道來

而先至此佛以鉢中菴摩羅果以示迦葉而

語之言汝今識此鉢中果不迦葉答言不識

此果佛言從此東行數萬踰闍那到弗婆提取此果來名菴摩羅極爲香美汝可食之迦葉聞已心自念言彼道去此極爲長遠而此沙門乃能俄爾已得往還觀其神化所未曾有然故不如我道真也迦葉即便下種種食

佛即呪願

婆羅門法中 奉事火爲最 一切衆流中

大海爲其最 於諸星宿中 月光爲其最

一切光明中 日照爲其最 於諸福田中

佛福田爲最 若欲求大果 當供佛福田

佛食已畢還歸所止洗鉢漱口坐於樹下明

日食時復往請佛佛言汝去我隨後往迦葉

適去俄爾之間世尊即便至瞿陀尼取呵梨

勒果滿鉢持來迦葉未至佛已先到迦葉後

來見佛已坐即便問言年少沙門從何道來

而先至此佛以鉢中呵梨勒果以示迦葉而語之言汝今識此鉢中果不迦葉答言不識此果佛言從此西行數萬踰闍那到瞿陀尼取此果來名呵梨勒極爲香美汝可食之迦葉聞已心自念言彼道去此極爲長遠而此沙門乃能俄爾已得往還觀其神通所未曾有然故不如我道真也迦葉即便下種種食佛即呪願

婆羅門法中 奉事火爲最 一切衆流中
大海爲其最 於諸星宿中 月光爲其最
一切光明中 日照爲其最 於諸福田中
佛福田爲最 若欲求大果 當供佛福田
佛食已畢還歸所止洗鉢漱口坐於樹下明日食時復往請佛言汝去我隨後往迦葉適去俄爾之間世尊即便至鬱單越取自然

粳米飯滿鉢持來迦葉未至佛已先到迦葉後來見佛已坐即便問言年少沙門從何道來而先至此佛以鉢中粳米飯以示迦葉而語之言汝今識此鉢中飯不迦葉答言不識此飯佛言從此北行數萬踰闍那到鬱單越取此自然粳米飯來極爲香美汝可食之迦葉聞已心自念言彼道去此極爲長遠而此沙門乃能俄爾已得往還雖復神通難可測量然故不如我道真也迦葉即便下種種食佛即呪願

婆羅門法中 奉事火爲最 一切衆流中
大海爲其最 於諸星宿中 月光爲其最
一切光明中 日照爲其最 於諸福田中
佛福田爲最 若欲求大果 當供佛福田
佛食已畢還歸所止洗鉢漱口坐於樹下明

日食時復往請佛佛言善哉即共俱行既到其舍下種種食佛即呪願

婆羅門法中 奉事火爲最 一切衆流中

大海爲其最 於諸星宿中 月光爲其最

一切光明中 日照爲其最 於諸福田中

佛福田爲最 若欲求大果 當供佛福田

爾時世尊呪願既畢即便取食獨還樹下食

竟心念須水釋提桓因即知佛意如大壯士

屈伸臂頃從天來下到於佛前頭面禮足即

便以手指地成池其水清涼具八功德如來

即便得而用之澡漱既畢爲釋提桓因說種

種法釋提桓因既聞法已歡喜踊躍忽然不

現還歸天宮是時迦葉於中食後林間經行

心自念言年少沙門今日受食還歸樹下我

當往彼而看視之即詣佛所忽見樹側有一

大池泉水澄淨具八功德怪而問佛此中云

何忽有此池佛即答言且受汝供還歸此食

食訖須水澡漱洗鉢釋提桓因知我此意從

天上來以手指地而成此池爾時迦葉既見

池水復聞佛言心自思惟年少沙門有大威

德乃能如此感致天瑞然故不如我道真也

爾時世尊別於他日林間經行見糞穢中有

諸弊帛即便拾取欲浣濯之心念須石釋提

桓因即知佛意如大壯士屈伸臂頃往香山

中取四方石安置樹間即白佛言可就石上

浣濯衣也佛復心念今應須水釋提桓因又

往香山取大石槽盛清淨水置方石所釋提

桓因所爲事畢忽然不現還歸天宮爾時世

尊浣濯已竟還坐樹下是時迦葉來至佛所

忽見樹間有四方石及大石槽即自思惟此

中云何有此二物心懷驚怪而往問佛年少沙門汝此樹間有四方石及以石槽從何而來於是世尊即答之言我向經行見地弊帛取欲浣之心念須臾釋提桓因知我此意即往香山而取之來迦葉聞已歎未曾有而自念言年少沙門雖有如是大威神力能感諸天然故不如我道真也爾時世尊又於他日入指地池而自洗浴洗浴訖已心念欲出無所攀持池上有樹名迦羅迦枝葉蔚映臨於池上樹神即便按此樹枝令佛攀出還坐樹下于時迦葉來至佛所忽然見樹曲枝垂蔭怪而問佛此樹何故曲枝垂蔭佛即答言我於向者入池洗浴出無所攀樹神致感爲我曲枝於是迦葉見樹曲枝又聞佛言歎未曾有而自心念年少沙門乃有如此大威德力

能感樹神然故不如我道真也爾時迦葉心自念言明日摩竭提王及諸臣民婆羅門長者居士等當來就我作七日會年少沙門若來在此國王臣民婆羅門長者居士等見其相好及以神通威德力者必當捨我而奉事之願此沙門於七日中不來我所佛知其意即便往詣北鬱單越七日七夜停彼不見過七日已集會訖畢國王辭去迦葉心念年少沙門近於七日不來我所善哉快哉我今既有集會餘饌欲以供之其若來者善得時宜於是世尊即知其意從鬱單越譬如壯士屈伸臂頃來到其前于時迦葉忽見如來心大驚喜即問佛言汝近七日遊行何處而不相見佛即答之摩竭提王及諸臣民婆羅門長者居士於七日中就汝集會汝起心念不欲

見我是故我往北鬱單越以避汝耳汝今心
念欲令我來所以今者故來詣汝迦葉聞佛
說此言已心驚毛豎而作此念年少沙門乃
知我意甚爲奇特然故不如我道真也爾時
世尊又於他日心自思惟優樓頻螺迦葉根
緣漸熟今者正是調伏其時思惟是已即趣
尼連禪河既到河側是時魔王來詣佛所而
白佛言世尊今者宜般涅槃善逝今者宜般
涅槃何以故所應度者皆悉解脫今者正是
般涅槃時如是三請世尊爾時答魔王言我
今未是般涅槃時所以者何我四部衆比丘
比丘尼優婆塞優婆夷未具足故所應度者
皆未究竟諸外道衆悉未降伏爾時如來亦
復三答魔王聞已心懷愁惱即還天官世尊
即便入尼連禪河以神通力故今水兩開佛

所行處步步塵出使兩面水皆悉涌起迦葉
遙見謂佛沒溺即與弟子乘船而來既至河
側見佛行處皆悉塵起歎其希有而自念言
年少沙門雖有如此神通之力然故不如我
道真也是時迦葉即問佛言年少沙門欲上
船不佛言甚善于時世尊即以神力貫船底
入結跏趺坐迦葉見佛從船底入而無穿漏
歎其希有心自念言年少沙門乃有如是自
在神力然故不如我得真阿羅漢也佛即語
言迦葉汝非阿羅漢亦復非是阿羅漢向汝
今何故起大我慢迦葉聞說如此語時心懷
愧懼身毛皆豎而自念言年少沙門善知我
心即白佛言如是沙門如是大仙善知我心
唯願大仙攝受於我佛即答言汝既年耆百
二十歲又復多有弟子眷屬又爲國王臣民

所敬若欲決定入我法者先與弟子熟共論
詳迦葉答言善哉善哉如大仙勅然我內心
非不決定爲當還與弟子論耳作此語已即
還本處集諸弟子而語之言年少沙門住此
以來見其種種神通變化極爲奇特智慧深

又八

十四

遠性又安庠我今便欲歸依其法汝等云何
弟子答言我等所知皆尊者恩年少沙門既
爲尊者之所歸信豈當有虛我等亦見有諸
奇異尊者若欲必受其法我等亦願隨從歸
依于時迦葉聞諸弟子作是言已即便相與
俱詣佛所而白佛言我及弟子今定歸依唯
願大仙時攝我等佛言善來比丘鬚髮自落
袈裟著身即成沙門爾時世尊即隨所應廣
說四諦于時迦葉聞說法已遠塵離垢得法
眼淨乃至漸漸成阿羅漢爾時迦葉五百弟

子既見其師已爲沙門心生願樂亦欲出家
即白佛言我等大師已爲大仙之所攝受今
成沙門我等亦樂隨大師學唯願大仙聽我
出家佛言善來比丘鬚髮自落袈裟著身即
成沙門於是世尊即爲轉於四諦法輪時五
百弟子遠塵離垢得法眼淨成須陀洹果漸
漸修行乃至亦得阿羅漢果爾時迦葉及五
百弟子以其事火種種之具悉皆捐棄尼連
禪河師徒相與隨佛而去爾時迦葉二弟一
名那提迦葉二名伽耶迦葉各有二百五十
弟子在尼連禪河側居兄下流忽見其兄并
及弟子所事火具悉逐流來心大驚愕而自
念言我兄今者有何不祥事火之具今隨水
流將非惡人之所害耶是時二弟奔競相就
而共議言我兄今者若復不爲惡人所害諸

又八

十五

物何緣從水而來苦哉怪哉我等宜速共至兄所即便相與逆流而上至兄住處空寂無人心大悲絕不知其兄及諸弟子之所在處四向推尋遇見舊人而問之言我仙聖兄及諸弟子不知所在汝見之不舊人答言汝仙聖兄與諸弟子棄事火具皆悉往於瞿曇之所出家學道是時二弟聞此語已心大懊惱怪未曾有又自念言云何棄於阿羅漢道而復更求他餘法耶即便馳往至其兄所到已見兄井及眷屬剃除鬚髮身被袈裟即便跪拜而問兄言兄本既是大阿羅漢聰明智慧無與等者名聞十方莫不宗仰何故於今自捨此道還從人學此非小事爾時迦葉答其弟言我見世尊成就大慈大悲有三事奇特一者神通變化二者慧心清徹決定成就一

切種智三者善知人根隨順攝受以此事故於佛法中出家修道我今雖復國王臣民所見宗敬世論機辯無能折者然非求斷生死之法唯有如來所可演說能盡生死既值如是大聖之尊而不自勵師彼高勝則是無心亦爲無眼二弟自言若如兄語決定是成一切種智我所知得皆是兄力兄今既已從佛出家我等亦願隨順兄學即各語其諸弟子言我今欲同大兄於佛法中出家修道汝意云何時諸弟子即答師言我等所以得有知見皆大師恩大師若欲於佛法中而出家者亦願隨從於是那提迦葉伽耶迦葉各與二百五十弟子至於佛所頭面禮足而白佛言世尊唯願慈悲濟度我等佛言善來比丘鬚髮自落袈裟著身即成沙門時那提迦葉伽

耶迦葉又白佛言我諸弟子今皆欲於佛法
出家唯願世尊垂聽許佛即答言善哉善
哉爾時世尊便呼善來比丘鬚髮自落袈裟
著身即成沙門爾時世尊即爲那提迦葉伽
耶迦葉及諸弟子現大神變又應其心而爲
說法語言比丘當知世間皆爲貪欲瞋恚愚
癡猛火之所燒炙汝等往昔奉事三火既能
絕棄除此外惑今三毒火尚猶在身宜速滅
之時諸比丘聞佛此語於諸法中遠塵離垢
得法眼淨世尊又爲廣說四諦皆悉得於阿
羅漢果爾時世尊心自念言頻毗娑羅王往
昔於我有約誓言道若成者願先見度今日
時至宜應往彼滿其本願作此念已即與迦
葉兄弟及千比丘眷屬圍遶往王舍城詣頻
毗娑羅王所爾時頻毗娑羅王昔以聚落給

優樓頻螺迦葉者尺八既見迦葉及其弟子悉爲
沙門即還啓王說如此事王與諸臣既聞此
語心大驚怪默然無聲時外人民聞此語已
各相謂言優樓頻螺迦葉智慧深遠無與等
者年又耆老已得阿羅漢云何反爲瞿曇弟
子終無此理乃可說言沙門瞿曇爲弟子耳
爾時世尊漸近王舍城住於杖林時優樓頻
螺迦葉即便遣其常所使人白頻毗娑羅王
言我今於佛法中出家修道今隨從佛來至
杖林大王宜先禮拜供養王聞來信說此言
已方決定知優樓頻螺迦葉爲佛弟子即勅
嚴駕與諸大臣婆羅門及人民衆往詣佛所
至杖林外王即下輿除却儀飾步至佛前爾
時空中有天而語王言如來今者在此林中
是諸天人最上福田大王宜應恭敬供養又

應宣示國中人民皆悉令其供養如來時王
既聞彼天語已心大歡喜倍增踊躍便進林
中遙見如來相好莊嚴又見優樓頻螺迦葉
兄弟三人并其弟子前後圍遶如盛滿月處
衆星中步步踊悅不能自勝既至佛所頭面
禮足而白佛言我是月種摩竭提王名頻毗
娑羅世尊知不佛即答言善哉大王於是頻
毗娑羅王却坐一面時婆羅門及以大臣諸
人民衆皆悉就坐爾時世尊既見來衆皆安
坐已即以梵音慰問頻毗娑羅王言大王四
大常安隱不統理民務無乃勞耶王即答言
蒙世尊恩幸得安隱爾時頻毗娑羅王及餘
大學婆羅門長者居士大臣人民既見迦葉
爲佛弟子自相謂言嗚呼如來有大神力智
慧深遠不可思議乃能伏於如此之人以爲

弟子爾時復有諸餘人衆心自念言優樓頻
螺迦葉有大智慧普爲世人之所歸信云何
當爲沙門瞿曇而作弟子心懷狐疑爾時世
尊知彼心念即語迦葉汝今宜應現諸神變
于時迦葉即昇虛空身上出水身下出火身
上出火身下出水或現大身滿虛空中或復
現小或分一身爲無量身或現入地還復踊
出於虛空中行住坐卧舉衆見已歎未曾有
悉皆稱言第一大仙爾時迦葉現此變已即
從空下到於佛前頭面禮足而白佛言世尊
實是天人之師我今實是尊之弟子如是三
說佛即答言如是如是迦葉汝於我法見何
等利棄捨火具而出家耶於是迦葉以偈答
曰
我於昔日中 所事火功德 得生天人中

受於五欲樂 恒如是轉輪 沒於生死海

我見此過患 所以棄捨之 又復事火福

得生天人中 增長貪恚癡 是故我遠離

又復事火福 爲求將來生 既已有生故

必有老病死 已見如此事 是故棄火法

施會修苦行 及以事火福 雖得生梵天

此非究竟處 以是因緣故 所以棄事火

我見如來法 離生老病死 究竟解脫處

是故今出家 如來真解脫 爲諸天人師

以是因緣故 歸依大聖尊 如來大慈悲

現種種方便 及諸神通力 而以引導我

云何而復應 奉事於火法

爾時頻毗娑羅王及諸大衆聞優樓頻螺迦

葉說此偈言心大歡喜於如來所深生敬信

決定得知如來必成一切種智審知迦葉是

佛弟子爾時諸天於虛空中雨衆天華作妙
妓樂異口同音唱言善哉優樓頻螺迦葉快
說此偈爾時世尊知諸大衆心意決定無復
狐疑又觀其根皆已成熟即爲說法大王當
知此五陰身以識爲本因於識故而生意根
以意根故而生於色而此色法生滅不住大
王若能如是觀者則能於身善知無常如此
觀身不取身相則能離我及於我所若能觀
色離我我所即知色生便是苦生若知色滅
便是苦滅若人能作如此觀者是名爲解若
人不能作斯觀者是名爲縛法本無我及以
我所以倒想故橫計有我及以我所無有實
法若能斷此倒惑想者則是解脫爾時頻毗
娑羅王心自思惟若謂衆生言有我者而名
爲縛一切衆生皆悉無我既無有我誰受果

報爾時世尊知彼心念即語之言一切衆生
所爲善惡及受果報皆非我造亦非我受而
今見有造作善惡受果報者大王諦聽當爲
王說大王但以情塵識合於境生染累想滋
繁以是緣故馳流生死備受苦報若於境無
染息其累想則得解脫以情塵識三事因緣
共起善惡及受果報更無別我譬如鑽火因
手轉燧得有火生然彼火性不從手生及以
燧出亦復不離手及燧鑽彼情塵識亦復如
是時頻毗婆羅王又自思惟若以情塵識和
合故而有善惡受果報者便爲常合不應離
絕若不常合是則爲斷爾時世尊知王心念
即便答言此情塵識不常不斷何以故合故
不斷離故不常譬如緣於地水因彼種子而
生芽葉種子既謝不得名常生芽葉故不得

名斷離於斷常故名中道三事因緣亦復如
是爾時頻毗婆羅王聞此法已心開意解於
諸法中遠塵離垢得法眼淨八萬那由他婆
羅門大臣人民亦於諸法遠塵離垢得法眼
淨九十六萬那由他諸天又於諸法遠塵離
垢得法眼淨時頻毗婆羅王即從座起頂禮
佛足合掌白佛快哉世尊能捨轉輪聖王之
位出家學道成一切種智我昔愚癡欲留世
尊臨治小國今觀慈顏又聞正法方懷慙愧
追悔昔過唯願世尊以大慈悲受我懺悔我
便於昔日白世尊言若得道時願先度我今
日始蒙宿願成遂荷世尊恩得履道跡我從
今日供養世尊及比丘僧當今四事不使有
乏唯願世尊住於竹園令摩竭提國長夜獲
安佛即答言善哉大王乃能捨於三不堅法

求於三堅報當令王願得滿足也時頻毗娑
羅王知佛受請住竹園已頂禮佛足辭退而
去王還城已即勅諸臣今於竹園起諸堂舍
種種莊飾極令嚴麗懸繒幡蓋散華燒香悉
皆辦已即便嚴駕往至佛所頭面禮足而白
佛言竹園僧伽藍修理始畢唯願世尊與比
丘僧哀愍我故往往住彼也爾時世尊與諸比
丘及無量諸天前後圍遶入王舍城當於如
來蹈門閭時城中樂器不鼓自鳴門狹更廣
門下更高一切丘墟皆悉平坦臭穢塵垢自
然香淨聾者得聽瘡者能言盲者得視狂者
得正拘攣疾病普皆除愈枯木發華腐草榮
秀涸池增瀾香風清靡鳳雀孔翠鳬鴈鴛鴦
異類衆鳥繽紛翔集出和雅音有如是等種
種祥瑞既入城已與頻毗娑羅王俱往竹園

爾時諸天滿虛空中時王即便手執寶瓶盛
以香水於如來前而作是言我今以此竹園
奉上如來及比丘僧唯願哀愍爲我納受作
此言已即便捨水爾時世尊默然受之說偈
呪願

若人能布施 斷除於慳貪 若人能忍辱
求離於瞋恚 若人能造善 則遠於愚癡
能具此三行 速至般涅槃 若有貧窮人
無財可布施 見他修施時 而生隨喜心
隨喜之福報 與施等無異

三八

三三

爾時婆羅門大臣及餘人民見王奉施如來
僧伽藍皆悉踊躍生隨喜心爾時頻毗娑羅
王施僧伽藍已心大喜歡頭面禮足退還所
住閭浮提中諸王見佛頻毗娑羅最爲其首
諸僧伽藍竹園僧伽藍最爲其始爾時世尊

與諸比丘住竹園僧伽藍于時王舍城中有

二婆羅門聰明利根有大智慧於諸書論無

不通達辯才論議莫能摧伏一姓拘栗名優

婆室沙母名舍利故舉世喚爲舍利弗二姓

目犍連名目犍羅夜那各有一百弟子普爲

國人之所宗仰二人互共以爲親友極相愛

重咸共誓言若先得聞諸妙法者要相開悟

無得吝惜爾時阿捨婆耆比丘著衣持鉢入

村乞食善攝諸根威儀庠序路人見者皆生

恭敬時舍利弗忽於路次逢見阿捨婆耆善

攝諸根威儀庠序彼舍利弗善根既熟見阿

捨婆耆心大歡喜踊躍遍身停步瞻視不能

暫捨即便問言我意觀汝似新出家而能如

此攝諸情根欲有所問唯願見答汝今大師

其名何等有所教誡演說何法時阿捨婆耆

即便安庠而答之言我之大師得一切種智

是甘蔗種天人之師相好智慧及神通力無

與等者我既年幼學道日淺豈能宣說如來

妙法然以所知當爲汝說即說偈言

一切諸法本 因緣生無主 若能解此者

則得真實道

時舍利弗聞阿捨婆耆說此偈言即於諸法

遠塵離垢得法眼淨見道跡已心大踊躍身

諸情根皆悉悅豫而自念言一切衆生悉著

於我所以輪迴在於生死若除我想即於我

所亦皆得離譬如日光能破於闇無我之想

亦復如是悉能破於我見闇障我從昔來所

可修學皆爲邪見唯今所得是真正道作此

念已禮阿捨婆耆足還歸所止時阿捨婆耆

至前乞食訖還竹園時舍利弗還至住處時

目捷羅夜那善根已熟見舍利弗諸根寂定
威儀庠序顏容怡悅異於常日即便問言我
今觀汝諸根顏貌與常有異必當已得甘露
妙法我昔與汝共結誓言若聞妙法要相啓
悟汝有所得願爲我說時舍利弗即答之言
我今實已得甘露法目捷羅夜那聞已歡喜
無量歎言善哉時爲我說舍利弗言我今出
行逢一比丘執持衣鉢入村乞食諸根寂靜
威儀庠序我既見已深生恭敬既到其所而
問之言我意觀汝似新出家而能如此攝諸
情根欲有所問唯願見答汝今大師其名何
等有所教誡演說何法時阿捨婆耆即便安
庠而見答言我之大師得一切種智是甘蔗
種天人之師相好智慧及神通力無與等者
我旣年幼學道日淺豈能宣說如來妙法然

以所知當爲汝說即說偈言
一切諸法本 因緣生無主 若能解此者
則得真實道
爾時目捷羅夜那聞舍利弗說此語已即於
諸法遠塵離垢得法眼淨爾時舍利弗與目
捷羅夜那各於佛法得甘露已共相謂言我
等已於佛法各得利益今者宜應共往佛所
求索出家作此語已各喚弟子而語之言我
等今者已於佛法得甘露味唯有此法是出
世道我今欲往求佛出家汝等云何諸弟子
等答其師言我等今者有所知見皆大師力
師若出家我悉隨從於是二人即將二百弟
子往詣竹園旣入門已遙見如來相好莊嚴
諸比丘衆前後圍遶心大歡喜踊躍遍身雨
時世尊見舍利弗及目捷羅夜那與諸弟子

相隨來已告諸比丘汝等當知今此二人將諸弟子來至我所欲求出家一名舍利弗二名目捷羅夜那當於我法中爲上弟子舍利弗者於智慧中最爲第一目捷羅夜那者於神通中復爲無上至佛所已頭面禮足而白佛言我於佛法已得道跡樂欲出家願時聽許爾時世尊即便喚言善來比丘鬚髮自落袈裟著身即成沙門時彼二百弟子既見其師成沙門已俱白佛言我等亦欲隨師出家唯願世尊垂慈聽許於是世尊即復喚言善來比丘鬚髮自落袈裟著身即成沙門爾時世尊爲舍利弗及目捷羅夜那廣說四諦二人即得阿羅漢果又復爲彼二百弟子廣說四諦即於諸法遠塵離垢得法眼淨乃至亦成阿羅漢果爾時世尊即與一千二百五十

比丘皆大阿羅漢於摩竭提國廣利衆生諸比丘中多有人名目捷羅夜那世尊故名此目捷羅夜那爲大目捷羅夜那爾時偷羅厥叉國有一婆羅門名曰迦葉有三十二相聰明智慧誦四毗陀經一切書論無不通達極大巨富善能布施其婦端正舉國無雙二人自然無有欲想乃至亦不同宿一室久於往昔種善根故不樂在家受五欲樂日夜思惟厭離世間精勤求訪出家之法如是推尋不能得已即捨家事入於山林心念口言諸佛如來出家修道我今亦當隨佛出家即便脫去金縷織成珍寶之衣而著價直百千兩金壞色納衣自剃鬚髮爾時諸天於虛空中既見迦葉自出家已而語之言善男子甘蔗種族白淨王子其名薩婆悉達出家學道成一

切種智舉世號爲釋迦牟尼佛今者與千二百五十阿羅漢在王舍城竹園中住爾時迦葉聞天語已歡喜踊躍身毛皆豎即便往趣竹園僧伽藍爾時世尊知其當來而自思惟觀其善根宜往度之作是念已即行逆之到

八

二十六

于兜婆而逢迦葉時彼迦葉既見相好威儀特尊即便合掌而作此言世尊實是一切種智實是慈悲濟衆生者實是一切所歸依處即便五體投地頂禮佛足而白佛言世尊今者是我大師我是弟子如是三說佛即答言如是迦葉我是汝師汝是我弟子佛又語言迦葉當知若人實非一切種智而欲受汝爲弟子者頭則破裂以爲七分又復告言善哉迦葉快哉迦葉當知五受陰身是大苦聚于時迦葉聞此言已即便見諦乃至得於阿羅

漢果爾時世尊即與迦葉俱還竹園以此迦葉有大威德智慧聰明是故名之爲大迦葉爾時世尊告諸比丘普光如來出興世時善慧仙人豈異人乎即我身是緣路所遇五百外道所共論議及隨喜者今此會中優樓頻螺迦葉兄弟及其眷屬千比丘是時賣華女者今耶輸陀羅是善慧仙人髮布地時傍有二人掃佛前地及二百人隨喜助者今此會中舍利弗大目犍羅夜那并二百弟子比丘是虛空諸天見善慧仙人以髮布地悉皆隨喜而讚歎者我初得道鹿野苑中始轉法輪八萬天子及頻毗娑羅王所將眷屬八萬那由他人及九十六萬那由他天是汝等當知過去種因經無量劫終不摩滅我於往昔精勤修習一切善業及發大願心不退轉故於

八

二十七

今者而得成就一切種智汝等宜應勤修道
行無得懈怠時諸比丘聞佛所說歡喜頂戴
作禮而退

過去現在因果經卷第四

音釋

履竭戰切 蹈徒到切 閻苦本切 壁必益切
履屬也 蹈踐也 閻門限也 壁足不能
也 危馮犬切 野鴨也